


陝西通志




第五十六卷

人物二

廉能上

DS
793
S45S5
1735
V. 56



陝西通志第五十六卷

人物二

廉能上

周
蘓忿生

武王臣

周公曰太史司寇蘓公式敬爾由獄以長我王國

尚書立政

蘓忿生爲司寇用能敬其所由之獄培植基本以長我王國

蔡註

何比干字少卿平陵人學尚書於晁錯武帝時爲廷尉正與張湯同

時湯持法深而比干務仁恕數與湯爭雖不盡得然所活者以千

數後遷丹陽都尉獄無冤囚淮汝間號曰何公

萬姓統譜

張敞字子高平陽人祖父孺徙茂陵父福官光祿大夫敞後徙杜陵
補太守卒史擢豫州刺史數上事有忠言徵爲大中大夫以忤大

將軍光復出爲函谷關都尉徙山陽太守久之渤海膠東盜賊並起徵拜膠東相敞到膠東明設購賞開羣盜令相捕斬除罪由是盜賊解散詔以敞守京兆尹自趙廣漢誅後守尹皆不稱職長安市偷盜尤多敞求問長安父老偷盜酋長數人居皆溫厚出從童騎閭里以爲長者敞皆召見責問令致諸偷以自贖偷長願一切受署敞皆以爲吏遣歸休置酒小偷悉來賀且飲醉偷長以赭汙其衣裾吏坐里閭閱出者汙赭輒收縛之窮治所犯盡行法罰由是市無偷盜敞爲人敏疾見惡輒取時時越法縱舍其治畧循趙廣漢之迹然其政頗雜儒雅不純用誅罰以此能自全爲京兆九歲坐與光祿勳楊惲善公卿奏敞不宜處位奏寢不下敞使賊捕拏惲有所案驗惲以敞奏劾當免曰五日京兆耳安能復案事敞聞辭語即部吏收惲繫獄惲當出死敞使主簿持教告惲曰五日

京兆竟何如乃棄舜市行寃獄使者奏敞賊殺不辜天子薄其罪
下敞坐楊惲免爲庶人既數月冀州部中有大賊天子思敞功使
召敞拜冀州刺史敞既到部居歲餘盜賊禁止病卒初敞爲京兆
尹弟武拜爲梁相時梁王驕貴民多豪強號難治敞戒吏問武武
意欲以刑法治梁吏還道之敞笑曰武必辯治梁矣既到官其治
有迹敞孫竦王莽時至郡守封侯博學文雅過於敞然政事不及
也

漢書
本傳

黃霸字次公陽夏人以豪傑役使徙雲陵霸少學律令喜爲吏入穀
補左馮翊二百石卒史馮翊以霸入財爲官不署右職使領郡錢
穀計簿書正以廉稱察補河東均輸長復察爲河南太守丞霸爲
人明察內敏又習文法然溫良有讓足知善御衆爲丞處議當於
法合人心太守甚任之吏民愛敬焉自武帝末俗吏尚嚴酷以爲

能而霸獨用寬和爲名宣帝聞霸持法平召以爲廷尉正數決疑獄庭中稱平擢揚州刺史三歲以賢良高第爲潁川太守時上垂意於治數下恩澤詔書吏不奉宣霸爲選擇良吏分部宣布詔令民咸知上意使郵亭鄉官皆畜鷄豚然後爲條教置父老師帥伍長班行民間勸以爲善防姦之意及節用殖財米鹽靡密初若煩碎然霸精力能推行區處咸稱神明姦人去入他郡盜賊日少霸力行教化而後誅罰務在成就安全長吏許丞老病督郵白欲逐之霸曰許丞廉吏且善助之無失賢者意或問其故霸曰數易長吏送故迎新公私耗費皆出於民所易新吏又未必賢或不如故徒相益爲亂凡治道去其泰甚者耳霸以治爲天下第一徵守京兆尹以乏軍興貶秩歸潁川太守治如其前前後八年郡中全治五鳳三年代丙吉爲丞相霸材長於治民及爲相功名損於治

郡時薨諡曰定侯霸為丞相後徙杜陵

漢書本傳

楊惲字子幼

敞子華陰人

為郎補常侍騎霍氏謀反惲先聞知以聞封平

通侯遷中郎將以法令從事郎謁者有罪輒奏免薦舉其高第有行能者郎官化之莫不自厲絕請謁貨賂之端令行禁止擢光祿勳惲居殿中廉潔無私郎官稱公平然惲伐其行治又以其能高人由是多怨於朝廷與太僕戴長樂相失樂上書告惲罪詔免為庶人惲既失爵家居治產業以財自娛其友人安定太守孫會知畧士也與惲書諫戒之惲報書會有日食變騶馬猥佐成上書告惲章下廷尉案驗得所予會宗書宣帝見而惡之廷尉當惲大逆

無道要斬

漢書本傳

韓延壽字長公燕人徙杜陵少為郡文學擢諫大夫遷淮陽太守徙潁川潁川多豪強難治趙廣漢為太守患其俗多朋黨構會吏民

令相告訐潁川由是爲俗延壽欲更之教以禮讓乃歷召郡中長老爲鄉里所信向者數十人設酒具食接以禮意問以謠俗爲陳和睦親愛銷除怨咎之路長老皆以爲便議定嫁娶喪祭儀品畧依古禮不得過法於是令文學校官諸生皮弁執俎豆爲吏民行禮百姓遵用其教數年徙東郡太守延壽所至必聘其賢士用廣謀議納諫爭修治學宮春秋鄉射陳鐘鼓管絃盛升降揖讓及都試講武設斧鉞旌旗習射御之事又置正五長相率以孝弟不得舍奸人閭里阡陌有非常吏輒聞知姦人莫敢入界其始若煩後皆便安之在東郡三歲令行禁止斷獄大減爲天下最入守左馮翊滿歲稱職爲真歲餘出行縣至高陵民有昆弟訟田延壽大傷之曰幸得備位爲郡表率不能宣明教化令民骨肉爭訟咎在馮翊當先退因入卧傳舍閉閣思過令丞嗇夫三老亦皆自繫持

於是訟者宗族傳相責讓兩昆弟深自悔謝終死不敢復爭延壽乃起聽事勞謝令丞以下引見尉薦郡中歛然莫不相傳勅厲二十四縣莫復以辭訟自言者延壽代蕭望之爲左馮翊而望之遷御史大夫侍謁者福爲望之道延壽在東郡時放散官錢千餘萬會御史當問事東郡因並問之具得其事延壽在東郡時治餽兵車畫龍虎朱雀衣黃紃方領於是望之劾延壽僭上不道延壽竟棄市百姓莫不流涕延壽三子皆爲郎吏且死屬其子弗爲吏以已爲戒子皆去官不仕孫威復爲吏至將軍亦多恩信能拊衆得士死力又坐奢僭誅

漢書本傳

朱博字子元杜陵人家貧少時給事縣爲亭長稍遷功曹補安陵丞成帝即位舉櫟陽令徙雲陽平陵三縣以高第入爲長安令京師治理遷冀州刺史行部決遣如神吏民驚服徙琅琊太守齊部舒

緩養名博視事數年大改其俗博治郡常用屬縣豪傑以爲大吏
文武從宜縣有劇賊及他非常輒移書詭責之其盡力有效必加
厚賞懷詐不稱誅罰輒行以是豪強懾服入守左馮翊其治左馮
翊少愛利敢誅殺然亦縱舍時有大貸下吏以此爲盡力遷後將
軍坐免歲餘哀帝即位召爲京兆尹數月超爲大司空博爲人廉
儉不好酒色游宴食不重味好樂士大夫爲郡守九卿賓客滿門
欲仕者薦舉之欲報仇怨者解劍以帶之其趨事待士如是博以
此自立然終用以敗初定陶太后欲稱尊號太后從弟高武侯傳
喜持正議博代孔光爲丞相太后怨傳喜諷丞相奏免喜侯博受
詔奏喜在位無益於治請免爲庶人上知太后素怨喜疑博承指
召問狀博詣廷尉自殺

漢書
本傳

文京兆人孫寶爲京兆尹文以剛直不苟合常稱疾不肯仕寶以

恩禮請文欲爲布衣友文求署爲掾進見如賓禮數月以立秋日
署文東部督郵入見勅曰今日鷹隼始擊當順天氣取姦惡以成
嚴霜之誅掾部渠有其人乎文曰無其人不欲空受職寶曰誰也
文曰霸陵杜穉季寶曰其次文曰豺狼橫道不宜復問狐狸寶默
然穉季者大俠與衛尉淳于長厚善寶前失車騎將軍淳于長方
貴幸友寶寶亦欲附之始視事而長以穉季托寶故寶窮無以應
文文怪寶氣索知其有故因曰明府素著威名今不敢取穉季且
當闔閤勿有所問如此竟歲吏民未敢誣明府也即度季穉而遣
他事衆口謹譁終身自墮寶曰受教穉季耳目長聞知之杜門不
通水火穿舍後墻爲小戶但持鋤自治園因文所厚自陳如此文
曰我與穉季幸同土壤素無睚眚肯顧受將令分當相直誠能自改
嚴將不治前事即不更心但更門戶適趣禍耳穉季遂不敢犯法

漢書孫
寶傳

何並字子廉祖父自平輿徙平陵並爲大司空掾事何武武舉爲長陵令初卬成太后外家王氏貴侍中王林卿通輕俠傾京師後坐法免賓客愈盛歸長陵上塚因留飲連日先是林卿殺婢壻埋塚舍並具知之以非已時又新免故不發舉欲無令留界中而已卽遣吏奉謁傳送林卿素驕慙於賓客既去令騎奴還至寺門拔刀剗其建鼓並自從吏兵追林卿行數十里林卿迫乃令奴自代從間徑馳去會日暮追及收縛奴奴曰我奴耳並心知已失林卿乃叱吏斲頭持還縣所剗鼓置都亭下署曰故侍中王林卿坐殺人埋塚舍使奴剗寺門鼓吏民驚駭以爲實死哀帝問狀而善之徙潁川太守時潁川鍾元爲尚書令領廷尉弟威爲郡掾臧千金並爲太守過辭鍾廷尉廷尉免冠爲弟請一等之罪並曰罪在弟身

與君律不在太守元懼馳遣人呼弟陽翟輕俠趙季李欵多畜賓客縱橫郡中聞並至皆亡去並下車求勇猛曉文法吏十人使文吏治三人獄武吏徃捕之各持頭還並皆懸頭於市郡中清靜表善好士見紀潁川名次黃霸性清廉妻子不入官舍數年卒子恢王莽擢爲關都尉建武中以並孫爲郎

漢書本傳

關並

平陵人

王莽時徵能治河者以百數其大畧異者長水校尉平陵

關並言河決率常於平原東郡左右其地形下而土疏惡聞禹治水時本空此地以爲水上古難識近察秦漢以來河決曹衛其南北不過百八十里可空此地勿以爲官亭民舍而已大司馬史長安張戎言水性就下行疾則自刮除成空而稍深今西方諸郡以至京師東行民皆引河渭山川水溉田春夏乾燥少水時也故使河流遲貯淤而稍淺雨多水暴至則溢決而國家數隄塞之稍益

高於平地猶築垣而居水也可各順其性毋復灌溉則百川流行
水道自利無溢決之害矣

漢書溝洫志

師古曰新論云並字子陽材智

通達也戎字仲功習灌溉事也

本志注

郭伋字細侯茂陵人高祖解武帝時以任俠聞父梵爲蜀郡太守伋
少有志行哀平間辟大司空府遷并州牧更始新立三輔被兵寇
百姓震駭更始徵拜左馮翊使鎮撫百姓世祖即位拜雍州牧再
轉爲尚書令數納忠諫爭建武四年出爲中山太守明年轉漁陽
太守民多猾惡寇賊充斥伋示以信賞糾戮渠帥盜賊銷散時匈
奴數抄郡界伋整勅士馬設攻守之畧匈奴遠迹民得安業後潁
川盜起徵拜潁川太守伋到郡招懷山賊皆束手詣降十一年
伋爲并州牧伋前在并州素結恩德後所到縣邑老幼相攜逢
道路所過問民疾苦求耆德雄俊朝夕與參政事始行郡

美稷有童兒數百各騎竹馬迎拜事訖諸兒復送至郭外問使君何日當還仍計日告之既還先期一日仍為違信於諸兒遂止於野亭須期乃入二十二年徵為大中大夫明年卒時年八十六

後漢

書本傳

鮑恢

扶風人

鮑永為司隸校尉朝廷肅然辟扶風鮑恢為都官從事恢

亦抗直不避強禦

後漢書鮑永傳

孔奮字君魚茂陵人遭王莽亂奮與老母幼弟避兵河西建武五年河西大將軍竇融請署議曹掾守姑臧長姑臧稱為富邑居縣者輒至豐積奮在職四年財產無所增事母孝謹奉養極求珍膳躬率妻子同甘菜茹力行清潔隴蜀既平河西守令咸被徵召奮單車就路吏民斂牛馬器物追送一無所受至京除武都丞時隴西餘賊隗茂等殘殺郡守畏奮追急乃執其妻子為質奮終不顧望

窮力討之擒滅茂等奮妻子亦爲所殺世祖下詔褒美拜武都太守爲政明斷甄善疾非郡中稱爲清平第奇游學洛陽奮以奇經明當仕上病去官守約鄉閭卒於家奇博通經典作春秋左氏刪奮晚有子嘉官至城門校尉作左氏說云

漢書本傳

劉寬字文饒華陰人父崎順帝時爲司徒寬桓帝時大將軍辟五遷司徒長史延熹八年拜尚書令遷南陽太守寬仁多恕雖在倉卒中未嘗疾言遽色吏人有過但用蒲鞭罰之示辱而已有功善推之自下災異或見引躬克責每行縣止息亭傳引處士諸生執經對講見父老慰以農里之言少年勉以孝弟之訓人感德興行日有所化靈帝初徵拜大中大夫遷侍中宗正轉光祿勳嘉平五年

爲太尉封遂鄉侯

後漢書本傳

史崇字伯勤杜陵人建武中累官青冀二州刺史治尚寬簡不戢而

化以功封溧陽侯天下既平詔公侯皆就封因家焉卒謚壯侯

通志

第五倫字伯魚長陵人少有義行爲鄉嗇夫京兆尹閭興召爲主簿時長安鑄錢多姦巧乃署倫爲督鑄錢掾領長安市倫平銓衡正斗斛市無阿枉百姓悅服建武二十七年舉孝廉補淮南國醫工長從王朝京師見帝問以政事倫酬對政道帝大悅明日復特召入與語拜會稽太守躬自斬芻養馬受俸賤買與民會稽俗多淫祀好卜筮民常以牛祭神百姓困匱倫皆案之後遂斷絕永平五年坐法徵老小嗟呼相隨不得前倫乃僞止亭舍陰乘船去及詣廷尉吏民上書守闕者千餘人會帝幸廷尉錄囚徒得免歸田里數歲拜宕渠令遷蜀郡太守蜀地肥饒掾史皆鮮車怒馬以財貨自達倫悉遣還之更選孤貧志行之人以處曹任於是爭賕抑絕

文職修理所舉吏多至九卿二千石時以爲知人肅宗初立代牟融爲司空倫奉公盡節言事無所依違時人方之貢禹元和三年罷卒少子頡歷桂陽廬江南陽太守所在見稱順帝之爲太子廢也頡爲大中大夫與太僕來歷共固爭帝即位擢將作大匠卒官倫曾孫種字興先少厲志義永壽中以司徒掾清詔使冀州廉察災害舉奏刺史二千石以下甚衆還以奉使稱職拜高密侯相是時徐充二州盜賊羣輩高密在二州之交種大儲糧犒勤厲吏士賊聞皆憚之桴鼓不鳴流民歸者數千家遷兖州刺史中常侍單超兄子匡爲濟陰太守負勢貪放種欲收舉聞從事衛羽素抗厲乃召羽馳至定陶收匡賓客四十餘人糾發其贓五六十萬種即奏匡并劾超州內震慄朝廷嗟歎之超遂以事陷種徙朔方初種爲衛相以門下掾孫斌賢善遇之及當徙斌具聞超謀乃將決

晨夜追種遮險格殺送吏遂得脫歸數年徐州從事臧旻上書訟之會赦出卒於家

後漢書本傳

王況字文伯杜陵人代爲三輔名族該總五經志節高亮爲陳留太守性聰敏善行德教永平十五年蝗蟲過陳留界飛逝不集五穀獨豐章和元年詔以況爲司徒

後漢書虞延傳注

廉范字叔度杜陵人曾祖褒成哀間爲右將軍祖母王莽時爲大司馬皆有名前世父客死於蜀范年十五辭母西迎父喪蜀郡太守張穆丹故吏乃重貲送范范無所受與客步負喪歸葭萌載船觸石破沒范抱持棺柩遂俱沉溺衆傷其義鈎求療救僅免於死歸葬服竟詣京師受業事博士薛漢會漢坐事誅故人門生莫敢視范獨往收斂之由是顯名舉茂材數月再遷爲雲中太守會匈奴大入塞范令軍士各交縛兩炬三頭爇火營中星列虜謂漢兵救

至大驚待旦將退范令軍中蓐食晨往赴之斬首數百級虜自相
麟藉死者千餘人由此不敢復向雲中後頻歷武威都二郡太
守隨俗化導各得治宜建初中遷蜀郡太守其俗尚文辯好相持
短長范每厲以淳厚不受偷薄之說舊制禁民夜作以防火災而
燒者日屬范毀削前令但嚴使儲水而已百姓爲便歌曰廉叔度
來何暮不禁火民安作平生無襦今五絳在蜀數年免歸鄉里卒

於家

後漢書
本傳

秦彭字伯平茂陵人自漢興之後世位相承六世祖襲爲潁川太守
與群從同時爲二千石者五人三輔號萬石秦氏彭同產女弟顯
宗時爲貴人有寵永平七年以彭貴人兄擢開陽城門候十五年
拜騎都尉副耿秉北征匈奴建初元年遷山陽太守崇好儒雅敦
明庠序每春秋饗射輒修揖讓升降之儀爲人設四誡定六親長

幼之禮遵奉教化者擢爲鄉三老常以八月致酒肉勸勉之吏有
過咎罷遣而已不加恥辱興起稻田數千頃每於農月親度頃畝
分別肥瘠差爲三品各立文簿藏之縣鄉於是姦吏跼蹐無所容
詐在職六年轉潁川太守有鳳凰麒麟嘉禾甘露之瑞肅宗幸潁
川賞賜錢穀恩寵甚異章和二年卒弟惇襲並爲射聲校尉

後漢書本

魯恭字仲康平陵人祖父匡有權數號智囊父某爲武陵太守卒時
恭年十二服喪禮過成人建初初拜中牟令專以德化爲理不任
刑罰訟人許伯等爭田累守令不能決恭爲平理曲直皆輟耕相
讓亭長從人借牛而不還牛主訟於恭恭歎曰是教化不行也欲
解印綬去掾吏涕泣共留亭長慚悔還牛建初七年郡國螟傷稼
不入中牟河南尹袁安聞之疑不實使仁恕掾肥親往廉之恭隨

將雛親瞿然起曰所以來者欲察君之政迹耳今蟲不犯境一異也化及鳥獸二異也豎子有仁心三異也久留徒擾賢者還府具以狀白安安因上書言狀帝異之後拜侍御史和帝遣竇憲擊匈奴恭上疏諫不從拜魯詩博士學者日盛遷樂安相時州多盜恭盡平之永元九年徵拜侍中遷光祿勳為司徒坐事免永初元年復為司徒恭性謙退奏議依經潛有補益然終不自顯以老病策

罷卒於家以兩子為郎長子謙為隴西太守有名績

後漢書本傳

馬棱字伯威

援族孫茂陵人

少孤依從兄毅恩猶同產毅卒無子棱心喪三

年建初中仕郡功曹舉孝廉徵拜謁者章和元年遷廣陵太守民饑奏罷鹽官以利百姓賑貧薄賦興復陂湖溉田二萬餘頃吏民刻石頌之永元二年轉漢陽太守有威嚴稱後江湖多劇賊以棱

爲丹陽太守發兵掩擊皆禽滅之轉會稽太守治亦有聲永初中

卒於家

後漢書
馬援傳

法雄字文彊鄱人世爲二千石雄初仕郡功曹舉高第除平氏長善政事好發擿姦伏吏人畏愛永初三年海賊張伯路等寇濱海九郡徵雄爲青州刺史討之連戰破賊斬首溺死者數百人餘賊遁走遼東止海島上五年春乏食復抄東萊間雄擊破之州界清靜雄每行部錄囚徒察顏色多得情僞長吏不奉法者皆解印綬去遷南郡太守斷獄省少戶口益增郡多虎狼之暴前太守賞募張捕反爲所害雄移書屬縣曰至化之世猛獸不擾皆由恩信寬澤仁及飛走太守雖不德敢忘斯義其毀壞檻穽不得妄捕是後虎害消息人以獲安在郡數歲歲常豐稔初平中卒官

後漢書
本傳

閻憲字孟度成固人名知人爲綿竹令以禮讓爲化民莫敢犯男子

杜成夜行得遺物一囊中布錦二十五疋求其主還之曰縣有明君何敢負其化童謠歌曰閭尹賦政既明且晷去苛去辟動以禮讓遷蜀郡民泣涕送之以千數

漢中士女志。按閭憲華陽國志作閭慮

常義字季節

彪族子杜陵人

兄順字叔文平輿令有高名次兄豹字季明數

辟公府輒以事去安帝西巡徵拜議郎義少與二兄齊名初仕州郡太傅桓焉辟舉理劇為廣都長甘陵陳二縣令政甚有績官曹無事牢獄空虛以兄順喪去官比辟公府不就廣都為生立廟及卒三縣吏民舉哀若喪考妣豹子著字休明少以經行知名不應州郡命桓帝公車備禮徵至霸陵稱病歸乃入雲陽山采藥不返靈帝即位中常侍曹節欲借寵時賢以為名白帝就家拜著東海相詔書逼切不得已解巾之郡政任威刑為受罰者所奏又後妻驕恣亂政以之失名隱者恥之

後漢書
常彪傳

第五訪字仲謀長陵人少孤貧常傭耕以養兄嫂仕郡爲功曹察孝廉補新都令政平化行三年之間鄰縣歸之戶口十倍遷張掖太守歲饑開倉賑給吏懼譴爭欲上言訪曰若上須報是棄民也太守樂以一身救百姓遂出穀賦人順帝璽書嘉之由是一郡得全歲餘官民並豐界無姦盜遷南陽太守去官拜護羌校尉邊境服其威信卒於官

後漢書本傳

趙瑤字元珪琰字稚珪

南鄭人

凡七兄弟宣子也皆以令德著聞瑤始

爲緱氏令遷扶風太守徙蜀郡司空張溫謂之曰昔第五伯魚徙

蜀郡爲司空掃吾第以待足下矣瑤曰諾尋換廣漢卒琰始爲青

州刺史部下清肅徙梁相徵拜尚書不就卒

漢中士女志

宋果字仲乙扶風人以烈氣聞辟公府侍御史并州刺史所在能化

後漢書郭泰傳

張亮則字元修南鄭人爲牂牁太守威著南土永昌越雋夷謀欲反
畏則換臨其郡相諫而止號曰卧虎遷護羌校尉徵拜扶風又換
臨桂陽皆平盜賊巴郡板楯反拜隆集校尉鎮漢中徙梁州刺史
又爲魏郡太守所在稱治

漢中士女志

魏

杜畿字伯侯杜陵人少以孝聞年二十守鄭縣令縣囚繫數百人畿
裁其輕重決遣之舉孝廉除漢中府丞建安中爲司空司直遷護
羌校尉使持節領西平太守太祖定河北高幹舉并州反河東衛
固范先與幹通謀拜畿河東太守固等使數千人絕陝津畿遂詭
道從鄆津度謂衛固范先曰君臣有定義大事當共平議固等喜
陽事畿不以爲意會吏民多舉城助畿大兵至幹敗固等伏誅河
東定畿治有章程郡中化之太祖西征與賊夾渭爲軍軍食一仰

河東畿在河東十六年爲天下最文帝賜爵關內侯徵守司隸校尉帝征吳以畿爲尚書僕射統留事受詔作御樓船於陶河試船遇風沒帝爲流涕追贈太僕諡戴侯子恕嗣恕字務伯太和中爲散騎黃門侍郎論議亢直出爲弘農守頃之爲幽州刺史使持節護烏丸校尉征北將軍程喜劾奏恕下廷尉當死徙章武郡死徙所甘露二年河東樂祥訟畿遺績詔封恕子預豐樂亭侯邑百戶

三國魏志本傳

龐迪

扶風人

河南尹扶風龐迪以清賢稱

魏志邠原傳

楊沛字孔渠萬年人初平中爲新鄭長太祖輔政遷爲長社令時曹洪賓客在縣界徵調不肯如法沛殺之太祖以爲能累遷九江東平樂安太守並有治迹坐髡刑輸作未竟會太祖出征在譙聞鄴下頗不奉科禁乃發教選鄴令當得最能如楊沛比故沛從徒中

起爲鄴令軍中豪右畏沛各遣告子弟使各自檢勅關中破代張
既領京兆尹沛前後宰歷城守不以私計介意故身退之後家無
餘積

三國志賈
充傳注

魯芝字世英鄆人舉孝廉除郎中累遷尚書郎曹真督關右參大司
馬軍事轉天水太守傾心鎮衛更造城市數年間舊境悉復明帝
策書嘉歎勉以龔黃之美曹爽輔政引爲司馬宣帝起兵誅爽芝
斬關出勸爽挾天子保許昌爽不能用芝坐爽下獄當死宣帝赦
而不誅使持節領護匈奴中郎將并州刺史以綏輯有方遷大鴻
臚晉武踐祚轉鎮東將軍進爵爲侯尋徵爲光祿大夫卒諡曰貞

晉書
本傳

實允字雅始平人清尚自修少仕縣稍遷郡主簿舉孝廉除浩亶長

勤於爲政勸課田蠶平均調役百姓賴之遷謁者拜臨水令克已厲俗士庶咸歌詠之遷鉅鹿太守甚有政績卒於官

晉書本傳

王育字伯春京兆人少孤貧爲人牧羊每過小學必歔歔流涕時暇即折蒲學書同郡許子章聞而嘉之給衣食使與子同學遂博通經史太守杜宣命爲主簿司徒王渾辟爲掾除南武陽令爲政清約宿盜逃奔他郡遷并州都護

晉書本傳

王遜字邵伯魏興人仕郡察孝廉爲吏部令史累遷上洛太守轉魏興太守惠帝末西南夷叛以遜爲寧州刺史遜道遇寇賊踰年乃至外逼李雄內有夷寇吏士散沒城邑邱墟遜披荒糾厲收聚離散專仗威刑鞭撻殊俗誅豪右不奉法度者數十家征伐諸夷俘馘千計獲馬及牛羊數萬餘於是威行寧土又遣子澄奉表勸進元帝帝嘉之賜爵褒中縣公李雄遣李驤寇寧州遜使將軍姚崇

拒之戰於堂狼大破驤等追至瀘水透水死者千餘人崇以道遠不敢渡水遜以崇不窮追執崇鞭之怒甚髮上衝冠冠爲之裂夜中卒州人復立遜中子堅行州事詔除堅寧州刺史謚遜曰壯陶侃慮堅不能抗對徵還京病卒兄澄襲爵歷魏興太守散騎常侍

晉書
本傳

南宋

吉翰字休文池陽人初爲龍驤將軍道憐參軍爲將佐十餘年清謹剛正甚爲高祖所賞永初三年轉道憐大尉司馬出督梁南秦二州諸軍事龍驤將軍梁南秦二州刺史徙益州刺史在益州著美績甚得方伯之體論者稱之六年徵還時太祖經畧河南以翰爲司州刺史明年假節監徐兗二州豫州之梁郡諸軍事徐州刺史其下畏服莫敢犯刑明年卒官

宋書
本傳

杜驥字度世杜陵人曾祖丹避難河西符堅平涼州父祖始還關中
宋武帝平長安隨從南還驥累遷長沙王義欣後軍錄事參軍元
嘉十七年爲青冀二州刺史在任八年惠化著於齊土自義熙至
於宋末刺史唯羊穆之及驥爲吏民所稱詠後徵爲左軍將軍兄
坦代爲刺史北土以爲榮坦長子琬爲員外散騎侍郎

南史本傳

吉士瞻字梁客蓮勺人少有志氣不事生業梁武起兵義陽太守王
撫之天門太守王志遜武陵太守蕭彊等並不受命鎮軍蕭穎胄
遣士瞻討平之歷秦梁二州刺史加都督又爲西陽武昌二郡太
守在郡清約家無私積普通七年卒謚曰明子子琨時在戎役聞
問一踊而絕良久乃蘇不顧軍制輒離所部遂以孝聞詔下旌異

南史本傳

常閭字友觀杜陵人世爲冠族祖楷晉長樂清河二郡太守父達慕
容垂大長秋閭少有重望世祖徵拜咸陽太守轉武都太守屬郝
溫吳愛反關中擾亂閭盡心撫納所部獨全子範歷守華山郡閭
兄子禎喜馮翊太守子祉太府少卿祉子義遠岐州刺史祉弟禎
有識幹給事黃門侍郎子文殊員外散騎侍郎閭從叔道福安遠
將軍子欣宗徐州長史帶彭城內史撫綏內外甚得民和轉大中
大夫卒諡曰簡子元叡潁川長史欣宗從父弟合宗東海太守閭
從子崇字洪基父肅字道壽劉義真鎮關中辟主簿歷魏興太守
崇入國除南潁川太守不好摘發細事郡中大治高祖聞而嘉賞
以爲司州中正復爲河南邑中正以平直見稱除華山太守卒子
猷之前將軍大中大夫

魏書
本傳

寇讚字奉國上谷人徙萬年父修之東萊太守讚少清潔姿容嚴凝
非禮不動除襄邑令姚泓滅秦雍人千餘家推讚為主歸魏拜河
南郡太守其後秦雍人來奔河南滎陽河內者戶至萬數拜讚南
雍州刺史於洛陽立雍之郡縣以撫之由是流人襁負自遠而至
參倍於前進爵河南公加安南將軍領南蠻校尉仍刺史分洛豫
二州之僑郡以益之在州十七年甚收公私之譽年老致仕卒謚
曰宣穆長子元寶豫州別駕子祖徐州刺史子靈孫赭陽太守元
寶弟虎皮有才器本縣令弟臻字仙勝居喪以孝稱除弘農太守
子祖訓順陽太守

魏書
本傳

嚴稜臨晉人遇亂避地河南劉裕以爲廣威將軍陳留太守戍倉垣
泰常中山陽公奚斤南討稜詣斤降太宗嘉其誠欵拜平遠將軍
假荊州刺史世祖踐祚除中山太守有清廉之稱年九十卒子稚

土襲爵東兗州刺史卒子量襲爵魏書本傳

帝或字遵度珍子杜陵人有學識為東豫州刺史綏懷蠻左頗得其心蠻

首田益宗子魯生魯賢數為寇掠自或至州咸戕啟修敬不復為

害或以蠻俗荒梗不識禮儀乃表立太學選諸郡生徒於州總教

又於城北置崇武館以習武焉境內清肅還遇大將軍京兆王總

西征請為長史拜通直散騎常侍尋以本官兼尚書為幽夏行臺

以功封陰盤縣男孝昌元年卒贈雍州刺史諡曰文子彪藍田太

守彪弟融以軍功賜爵長安縣公稍遷大司馬開府司馬魏書常閭傳

寇雋字祖雋讚孫萬年人孝昌中朝議以國用不足乃置鹽池都將秩比

上郡以雋為之永安初華州民史底與司徒楊椿訟田長史以下

以椿勢貴皆言椿直欲以田給椿雋曰史底窮民楊公橫奪其田

若欲損不足以給有餘未敢聞命遂以地還史底二年出為左

軍梁州刺史民俗荒獷多為盜賊雋乃令郡縣立庠序勸耕桑敦
禮讓數年之中風俗頓革屬魏室多故梁人弗敢逼雋在州清苦不治產業
秩滿徒步而還吏人送雋留連於道久之得出界大統二年東魏
授雋洛州刺史雋謀歸闕五年入關拜秘書監時典墳散逸雋選
置令史抄集經史羣書始備進開府儀同三司卒諡曰元子奉洵
州刺史奉弟顥少好學最知名居喪哀毀為典祀下大夫小納言

周書
本傳

陽猛

雄父邑
陽人

父斌上庸郡守正光中万俟醜奴作亂朝廷以猛商洛

首望擢大谷鎮將以禦醜奴行河北郡守轉華山郡守移鎮潼關

頻典三郡頗有聲績

周書
本傳

楊逸字遵道

津子華
陰人

有當世才度起家員外散騎侍郎給事中建義

初莊帝在河陽逸往謁除平東將軍光州刺史逸折節撫綏乃心
民務法令嚴明寬猛相濟於是合境肅然莫敢干犯時災饉連歲
人多餓死逸欲以倉粟賑給而所司懼罪不敢逸曰國以人爲本
人以食爲命以此獲戾吾所甘心遂出粟然後申表既出粟後其
老小殘疾不能自存活者又於州門煮粥飯之將死而得濟者以
萬數逸爲政愛人尤懼豪猾廣設耳目其兵吏出使下邑皆自持
糧人或爲設食者雖在閭室終不進咸言楊使君有千里眼那可
欺之在州政績尤美及其家禍余朱仲遠遣使於州害之吏人如
喪親戚城邑村落爲營齋供一月之中所在不絕太昌初贈尚書
僕射豫州刺史謚曰貞逸子謚歷散騎常侍謚弟遵吏部尚書

楊播
傳

薛端

英集子
夏陽人

有志操遭父憂居喪合禮與弟裕勵精篤學不交人事

魏孝武西遷周文以爲丞相府戶曹參軍從擒竇泰復弘農戰沙苑並有功累遷吏部郎中端性強直每有奏請不避權貴轉尚書右丞仍掌選事端久處選曹雅有人倫之鑒其所擢用咸得其才六官建拜軍司馬周孝閔帝踐祚遷戶部中大夫晉公護將廢帝召羣臣議之端頗具同異護不悅出爲蔡州刺史爲政寬惠人吏愛之轉基州刺史基州地接梁陳事藉鎮撫總管史寧催令赴任蔡州父老請留端者千餘人至基州未幾卒諡曰質子胄字紹元性慷慨志立功名隋文帝受禪三遷爲兗州刺史到官繫囚數百胄剖斷旬日便了囹圄空虛時人謂爲神明先是兗州城東沂泗二水合而南流汎濫大澤中胄遂積石堰之決而西注陂澤盡爲良田又通轉運利盡淮海百姓賴之號爲薛公豐兗渠轉郢州刺

史有惠政檢校相州甚有能名漢王諒作亂并州遣將慕容良東攻
曹曹欲以計却之遣說良良去朝廷以曹懷二心鎖詣大理相州
吏人詣闕理曹者百餘人曹竟坐除名配防嶺南道卒子筠獻知
名端策裕字仁友少以孝弟聞於州里弱冠丞相參軍事尋卒文
士誅之者數人

北史薛
辯傳

蘓讓字景恕

亮弟武
功人

幼聰敏好學頗有人倫鑒識初為本州主簿遷

武都郡守及太祖為丞相引為府屬甚見親待出為汾州刺史治

有善政尋卒官

周書蘓
亮傳

梁昕字元明烏氏人其先因官徙居京兆之盤屋祖重耳漳縣令父

勸儒州主簿昕少溫恭見稱州里周文帝軍次雍州昕以三輔望

族上謁即授右府長流參軍累遷丞相府主簿大統十二年除河

南郡守遷東荊州刺史昕撫以仁惠蠻夷悅之孝閔踐祚進位

騎大將軍天和初拜工部中大夫出爲陝州總管府長史昕性溫裕有幹能歷官內外咸著聲稱尋卒贈大將軍諡曰貞弟榮歷位下大夫開府儀同三司

周書本傳

皇甫璠字景瑜三水人世爲西州著姓後徙居京兆父和本州治中璠少忠謹有幹畧永安中補主簿以勤事被知每蒙褒賞歷官計部下大夫孝閔踐祚進驃騎大將軍開府儀同三司出爲隴右總管府長史璠性平和小心奉法安分守志恒以清白自處建德三年授隨州刺史政存簡惠百姓安之卒諡曰恭子諒少知名位至吏部下大夫

周書本傳

于義字慈恭雒陽人父謹從魏武帝入關因家京兆義少矜嚴有操尚篤志好學大統末以父功賜爵平昌縣伯周閔帝受禪累遷安

武太守專崇德惠不尚威刑有郡民張善安王叔兒爭財相訟義
曰太守德薄非其罪也取家財倍與兩人喻而遣去善安等各懷
愧移貫他州於是風教大洽進封建平郡公及高祖作相王謙構
逆以義爲行軍總管謙將達奚恭擁衆據開遠義將左軍擊破之

尋拜潼州總管歲餘以疾歸京師卒諡曰剛

隋書本傳

王長述霸城人早孤爲祖羆所養襲封扶風郡公除中書舍人周受
禪出拜廣州刺史甚有威惠吏人懷之後歷襄仁二州總管並有
能名及高祖爲丞相授信州總管部內夷獠未賓長述討平之王
謙作亂授行軍總管率衆討謙以功進柱國開皇初復上平陳之
計上善其能頻加賞勞後病卒諡曰莊

隋書本傳

韋師字公穎杜陵人少沉謹有至性少丁父母憂居喪盡禮及長涉
經史尤工騎射宇文護引爲記室轉兵曹參軍師雅知諸蕃風俗

及山川險易其有朝貢師必接對論其國俗如指諸掌夷人驚服無敢隱情高祖受禪遷河北道行臺詔爲山東河南十八州安撫大使平陳之役以本官領元帥掾陳國府藏悉委於師秋毫無所犯後除汴州刺史甚有治名卒官諡曰定

隋書本傳

常藝字世文

洗弟杜陵人

周文帝時以軍功致位上儀同高祖爲丞相擊

尉迴破尉惇皆有力焉高祖受禪拜齊州刺史爲政清簡士庶懷惠遷營州總管藝容貌瓌瑋每夷狄叅謁必整儀衛盛服以見之番人畏懼莫敢仰視大治產業與北夷貿易家資鉅萬開皇十五年卒官諡曰懷弟冲字世冲少以名家子釋褐衛公府禮曹叅軍稽胡屢爲寇亂冲自請安戢之因拜汾州刺史高祖踐祚進位開府歲餘發南汾州胡千餘人北築長城在塗皆亡因命冲綏懷叛者月餘皆至並赴長城尋拜石州刺史甚得諸胡歡心以母憂去

職起爲南寧州總管渠帥爨震及西爨首領皆詣府叅謁後檢校
括州事時東陽賊帥陶子定吳州賊帥羅慧方聚衆爲亂冲率兵
擊破之尋拜營州總管寬厚得衆心拜民部尚書未幾卒少子挺

最知名

隋書
世康傳

蘓孝慈扶風人少沉謹有氣幹從武帝伐齊以功進位開府高祖受
禪拜太府卿時王業初基百度伊始徵天下工匠無不畢集孝慈
總其事世以爲能拜兵部尚書上於陝州置常平倉轉輸京下於
是決渭水爲渠以屬河令孝慈督其役渠成上善之數歲進位大
將軍先是以百官供費不足臺省府寺咸置解錢收息取給孝慈
以爲官民爭利非興化之道上表請罷之開皇十八年出爲浙州
刺史仁壽初遷洪州總管俱有惠政其後桂林山越相聚爲亂詔
孝慈爲行軍總管擊平之卒於官

隋書
本傳

于璽字伯符翼子京兆人少有器幹仕周起家右侍上士高祖受禪拜汴

州刺史甚有能名尋轉邵州刺史在州數年甚有恩惠後檢校江

陵總管州人張願等數十人詣闕上表請留璽上嘉歎良久令還

邵州尋遷洛州刺史復為熊州刺史並有惠政以疾徵還京師卒

諡曰靜隋書于仲文傳

李圓通涇陽人給使高祖家初高祖恒令圓通監厨圓通性嚴整左

右婢僕咸所敬憚高祖作相委以心膂周氏諸王每伺高祖之隙

圖為不利賴圓通保護獲免者數矣高祖受禪深被任信伐陳之

役以功拜揚州總管長史轉并州總管長史秦孝王仁柔自善少

斷決府中事多決於圓通煬帝嗣位拜兵部尚書帝幸揚州以圓

通留守京師判宇文述田以還民述訴其受賂帝怒而徵之發疾

卒子孝常大業末為華陰令隋書本傳

唐

邱和洛陽人徙居郿重氣俠嫻弓馬仕周開府儀同三司入隋爲右武衛將軍歷資梁蒲三州刺史以寬惠著名拜代州刺史煬帝北巡饋獻精腴帝用爲博陵太守和善撫吏士得其心大業末海南苦吏侵數怨畔帝以和所吏淳良拜交趾太守撫接盡情荒境安之隋亡陳欸歸國謁見高祖語平生歡甚和時已老以稷州其故鄉也令爲刺史以自養卒諡曰襄

唐書本傳

皇甫無逸字仁儉萬年人歷涇陽太守治爲天下最再遷右武衛將軍帝幸江都詔居守洛陽帝被弒乃立越王侗及王世充篡斬關自歸高祖以無逸本隋勲舊尊遇之拜刑部尚書封滑國公歷陝東道行臺民部尚書遷御史大夫時蜀新定吏多橫恣詔無逸持節巡撫得承制除吏既至除貪暴用廉善法令嚴明蜀人以安

拜民部尚書出爲同州刺史徙益州大都督府長史所至輒閉閤不通賓客左右無敢出入者所須皆市易他境嘗按部宿民家鐙炷盡主人將續進無逸抽佩刀斷帶爲炷其廉介類如此母在長安疾篤太宗召還憂悸不能食道病卒

唐書本傳

李襲志字重光安康人仕隋始安郡丞大業末盜起襲志傾私產募士乘城拒盜蕭銑林士弘屢攻不下固守二年力窮援絕爲銑所陷武德初襲志潛圖歸國趙郡王孝恭承制授桂州總管五年來朝進柱國封始安郡公江州都督後討輔公祏爲水軍總管轉桂州都督襲志守桂二十八年政尚清省南荒便之致仕卒弟襲譽字茂實通敏有識度仕隋爲冠軍府司兵高祖定長安拜潞州總管詔委典運以饟東軍擢揚州大都督府長史揚州俗喜商賈襲譽引雷陂水築句城塘溉田八百頃以盡地利民多歸本召爲大

府卿爲人嚴慤居家儉嘗謂子孫曰吾性不喜財遂至窶乏然負
京有賜田十頃耕之足以食河內千樹桑事之可以衣江都書力
讀可進宦吾歿後能勤此無資於人矣遷涼州都督改同州刺史
坐在涼州以私憾杖殺番禾丞廢爲民流泉州卒

唐書
本傳

韋仁壽萬年人隋大業末爲蜀郡司法書佐高祖入關擢雋州都督
府長史南寧州納欵朝廷歲遣使撫接至率貪沓邊人苦之多叛
去帝素聞仁壽治理詔檢校南寧州都督寄治越雋仁壽將兵循
西洱河開地數千里置七州十五縣酋豪來見即授以牧宰威令
簡嚴人人安悅將還酋長泣曰天子藉公鎮撫奈何欲去我仁壽
曰吾奉詔撫循庸敢擅留夷夏父老悲啼祖行遣子弟隨貢方物
天子大悅仁壽請徙治南寧州假兵撫定詔可敕益州給兵護送
刺史竇軌疾其功誅言山獠方叛未可遠畧不時遣歲餘卒

唐書
本傳

馮立馮翊人有武藝畧涉書記思太子建成引爲翊衛車騎將軍建
成被誅其左右多逃散立歎曰豈有生受其恩而死逃其難於是
率兵犯元武門苦戰久之解兵遁於野俄來請罪太宗慰勉之未
幾突厥至便橋立率數百騎與虜戰於咸陽殺獲甚衆太宗聞而
嘉歎拜廣州都督不營產業取給衣食而已在職數年甚有惠政
卒於官

舊唐書
本傳

謝叔方萬年人初從巢刺王元吉征討數有戰功元吉奏授屈咥直
府左車騎太宗誅隱太子及元吉於元武門叔方率府兵與馮立
合軍拒戰秦府護軍尉遲敬德傳元吉首以示之叔方下馬號哭
而遁明日出首太宗曰義士也命釋之歷遷西尹二州刺史善綏
邊鎮胡戎愛而敬之貞觀末累加銀青光祿大夫歷洪廣二州都
督永徽中卒

舊唐書
本傳

竇靜字元休平陵人高祖入京師擢并州大總管府長史時突厥數
爲邊患糧道不屬靜表請屯田太原以省餽運歲收粟十萬斛詔
檢校并州大總管太宗即位授司農卿改夏州都督突厥携貳諸
將出征者過靜靜爲陳虜中虛實諸將由是大克獲部落皆內附
帝嘉之再遷民部尚書卒諡曰肅

唐書竇威傳

張儉字師約新豐人父植車騎將軍儉以功除右衛郎將遷朔州刺
史時頡利可汗方彊每有求取所遣書輒稱詔敕邊吏奉承不敢
却儉獨拒不受大教民營田歲收穀數十萬斛州以完安李靖既
平突厥有思結部者窮歸於儉儉受而安輯之徙勝州後將不察
遽奏思結叛時儉以母喪奪服使撫納之儉單騎入其部召酋帥
慰諭咸匍匐歸命因舉徙代州遂檢校代州都督墾田力耕私蓄
富實儉恐虜易驕乃建平糴法入之官由是儲斛流羸遷營州都

督太宗將征遼東拜行軍總管使領諸蕃騎爲六軍前鋒超建安
城破賊累封皖城郡公永徽初卒諡曰密兄大師太僕卿華州刺
史武功縣男弟延師左衛大將軍范陽郡公性謹畏典羽林兵三
十年未嘗有過卒諡曰敬儉兄弟三人門皆立戟時號三戟張家
唐書本傳

韓仲良

瑗父三原人

武德初與定律令建言周律其屬三千秦漢後約爲

五百依古則繁請崇寬簡以示維新於是採開皇律宜於時者定
之終刑部尚書

唐書韓瑗傳

唐臨字本德長安人爲萬泉丞有輕囚久繫方春農事興臨說令可
且出囚使就畎畝不許令移疾臨悉縱歸與之約囚如期還遷侍
御史俄持節按獄交州出冤繫三千人累遷大理卿高宗常錄囚
餘司斷者輒紛訴不已獨臨所訊無一言帝問故答曰唐卿斷囚

不寃所以絕意帝歎曰爲獄者固當如是永徽元年拜御史大夫
累遷吏部尚書坐免官起爲潮州刺史卒兄皎武德初爲秦王府
記室從王征討掌書檄貞觀中官吏部侍郎先選集四時補擬不
爲限皎請以冬初集盡季春止後遂爲法終益州長史子之奇除
蒼括令與徐敬業起兵伏誅

唐書本傳

杜楚客

如晦弟杜陵人

少尚奇節擢中郎將進蒲州刺史政有能名後爲魏

王府長史遷工部尚書攝府事以威肅聞揣帝意薄承乾數言王

聰睿可爲嗣及王貶爵廢於家終虔化令

唐書本傳

田仁會長安人祖軌幽州刺史父弘陵州刺史仁會擢制舉仕累左

武侯中郎將永徽中爲平州刺史歲旱自暴以祈雨大至穀遂登

五遷勝州都督境有風賊依山剽行入仁會發騎捕格夷之城門

夜開道無寇跡入爲太府少卿遷右金吾將軍晝夜循行有餘

姦必發京師憚之轉右衛將軍卒諡曰威

唐書本傳

竇德元

威從孫平陵人

父彥隋西平郡守德元爲高祖丞相府千牛遷司元

太常伯麟德初進檢校左相勤職約已天子臨朝咨其清素卒諡

曰恭

唐書竇威傳

常弘機萬年人祖元禮隋浙州刺史弘機仕貞觀時累遷殿中監顯

慶中爲檀州刺史以邊人陋僻乃修學宮畫孔子七十二子漢晉

名儒像敦勸生徒繇是大化擢司農少卿主東都營田苑宦者犯

法杖乃奏遷司農卿初東都方士朱欽遂爲武后所寵姦賊狼藉

弘機白帝逐欽遂於邊后恨之帝將復任爲后掎而止孫岳子武

后時爲汝州司馬以辨治稱遷永州長史歷廬海等州刺史皆著

風迹恩嚴兩施睿宗立召爲殿中少監授陝州刺史卒

唐書本傳

李元紘字大綱其先滑州人後占京兆萬年曾祖粲仕隋爲金吾衛

大將軍善撫循能得士心高祖入關以衆歸後爲左監門大將軍
諡曰明祖寬爲太常卿隴西公父道廣爲汴州刺史有善政突厥
契丹寇河北議發河南兵擊之百姓震擾道廣悉心撫定人無離
散遷殿中監同平章事卒諡曰成元絃早修謹仕爲雍州司戶時
太平公主勢震天下嘗與民競碾磴元絃還之民長史竇懷貞大驚
趣改之元絃大書判後曰南山可移判不可搖也改好時令遷潤
州司馬以辦治得名開元初爲萬年令賦役稱平擢京兆少尹三
遷吏部侍郎遂拜中書侍郎門下平章事元絃當國務峻崖檢抑
奔競夸進者憚之是時廢京師職田議者欲置屯田元絃曰軍國
不同內外異制若人閒無役棄地不墾以閒手耕棄地省饋運實
軍糧屯田爲益尚矣今百官職田不一縣百姓私田皆自耕若置
屯即當公私相易調發丁夫調役則業棄於家免庸則賦闕於

恐得不補失徒為煩費遂止致仕卒諡文忠

唐書本傳

權懷恩

萬紀族孫萬年人

祖弘壽佐高祖平京師擢太僕卿懷恩以蔭累遷

尚乘奉御馭人安畢羅為高宗所寵見帝戲慢不恭懷恩奏事適

見之退杖四十帝歎賞曰良吏也擢萬年令賞罰明見惡輒取時

語曰寧飲三斗塵無逢權懷恩更慶萊衛邢宋五州刺史洛州長

史所居威名赫然吏重足立遷益州大都督府長史卒

唐書權萬紀傳

楊昉

纂從子華陰人

武后時為肅機宇文化及子訴治先蔭昉方食未判遽

曰肅機而未食庸知天下有冤而求食乎昉怒取牒署曰父弑隋

主子訴隋資可乎人服其敏終工部尚書

唐書楊弘禮傳

張知謩字匪躬幽州人徙家岐兄弟五人知元知晦知泰知默皆明

經高第曉吏治清介有守公卿爭為引重知謩歷十一州刺史所

蒞有威嚴中宗在房州知謩為刺史供儼保戴不少弛帝復位拜

左衛將軍知泰御史臺大夫伯仲華首同貴時以爲榮知謇惡請
謁求進士不才冒位視之若讐每勅子孫經不明不得舉家法可稱
云武后革命知泰奏置東都諸關十七所譏斂出入百姓驚駭卒
罷不用知謇與監察御史王守慎來俊臣周興掌詔獄卒陷酷吏
子孫禁錮爲張氏羞知元子景昇知泰子景佚開元中皆顯官

唐書

張知謇傳

常知人字行哲

叔謙子萬年人

弱而好古以國子舉授校書郎遷司庫員外

郎卒子維繩維字文紀進士對策高第擢武功主簿督役乾陵會
歲饑均力勸功人不知勞徙內江令教民耕桑縣爲刻頌遷戶部
郎中終太子庶子繩舉孝廉歷長安尉威行京師擢監察御史更
泗涇鄜三州刺史天寶初入爲秘書少監以善職稱終陳王傳
心字無逸維子舉孝廉遷大理丞侍御史神龍中按大獄據正

撓景龍中屬羌叛既禽捕有詔悉誅虛心惟論酋長死原活其餘

遷御史中丞歷荊潞揚三大都督府長史以廬江多盜遂縣舒城

盜賊爲衰入爲工部尚書東京留守卒諡曰貞弟虛舟歷洪魏二

州刺史有治名入爲刑部侍郎

唐書常
奏傳

蘇幹

環從父兄
武功人

擢明經授徐王府記室叅軍王好畋每諫止之垂拱

中遷魏州刺史河朔饑幹檢吏督姦勸課農桑以治稱拜右羽林

軍將軍遷冬官尚書來俊臣素忌之誣幹與瑯琊王冲通書繫獄

發憤卒諸子誅字廷言舉賢良方正高第累轉給事中出徐州刺

史治有迹

唐書蘇
環傳

尹思貞長安人弱冠以明經第調隆州叅軍事邑豪蒲氏驚肆不法

思貞按之擿其姦論死部人稱慶遷明堂令以善政聞檢校洛州

刺史會契丹亂朔方震驚思貞境內無擾除青州刺史治州有績

蠶至歲四熟黜陟使路敬歎美曰是非善政致祥乎表言之睿宗立累遷工部尚書請致仕開元四年卒諡曰簡思貞前後爲刺史十三郡其政皆以清最聞

唐書本傳

常景駿

弘機孫萬年人

中明經神龍中歷肥鄉令縣北瀕漳連年泛溢人苦

之景駿相地勢因高築鄣水至堤趾輒去其北燥爲腴田又維艚以梁其上而廢長橋功少費約後遂爲法方河北饑身巡閭里勸人通有無教導撫循民獨免流散後爲貴鄉令有母子相訟者景駿曰令少不天常自痛爾幸有親而忘孝耶教之不孚令之罪也因嗚咽流涕授孝經使習大義於是母子感悟請自新後爲趙州長史道出肥鄉民皆奉酒食迎犒有小兒亦在中景駿曰兒未生而吾去邑非有舊恩何故來對曰耆老言學廬館舍橋鄣皆公治意公爲古人今幸親見所以來景駿爲留終日後遷房州刺史

州窮險有蠻夷風無學校好祀淫鬼景駿爲諸生貢舉通隘道

傳舍罷祠房無名者轉奉天令未行卒

唐書本傳

韓思復字紹出長安人少孤年十歲母爲語父亡狀感咽幾絕祖倫特愛之舉秀才高第調梁府倉曹參軍會大旱輒開倉賑民州劾責對曰人窮則亂不如因而活之無趣爲盜賊州不能誅轉汴州司戶仁恕不行鞭罰遷滁州刺史州有銅官人鑪鑿尤苦思復爲賈他鄙費省獲多有黃芝五生州署民爲刻頌其祥徙襄州入拜給事中開元初復爲襄州刺史治行名天下卒諡曰文子朝宗初歷左拾遺睿宗詔作乞寒胡戲諫曰乞寒胡非古不法又道路籍籍咸言皇太子微服觀之白龍魚服可深畏也帝稱善特賜中上考開元二十二年以襄州刺史兼山南東道襄州南楚故城有昭王井傳言汲者死行人雖渴因不敢視朝宗移書諭神自是飲者

亡恙人更號韓公并天寶初召為京兆尹出為高平太守貶吳興
別駕卒朝宗孫攸字相之性清簡元和初第進士為殿中侍御史
累遷桂管觀察使部二十餘州自參軍至縣令無慮三百員吏部
所補纔十一餘皆觀察使商才補職攸下車會春服使至鄉有豪
猾厚賄使者求為縣令使者請攸攸許之既去召鄉豪責以撓法
笞其背自是豪右畏戢時詔置五管監兵盡境賦不足充其費攸
處以儉約遂為定制眾以為難

唐書
本傳

帝抗

安石從子
萬年人

弱冠舉明經累官吏部郎中景雲初為永昌令輦轂

煩要抗不事威刑而治遷右御史臺中丞邑民詣闕留不聽乃立
碑著其惠開元三年授黃門侍郎俄為御史大夫兼按察京畿第
拯方為萬年令兄弟領本部時以為榮進刑部尚書分掌吏部選
卒抗歷職清儉不治產及終無以葬元宗聞之特給轎車謚曰貞

唐書帝
安石傳

李朝隱字光國三原人明法中第調臨汾尉擢大理丞武三思構五
王御史鄭愔請誅之朝隱以不經鞫實不宜輕用法忤旨貶聞喜
令遷吏部員外時政出權幸內授官但斜封其狀付中書宣所司
朝隱執罷千四百員遷長安令宦官閭興貴有所干請曳去之睿
宗嘉歎進大中大夫一階以旌剛烈成安公主奪民園不酬直朝
隱取主奴杖之由是權豪斂伏開元初遷吏部侍郎銓叙明審久
之降滑州刺史徙同州擢河南尹政清嚴姦人不容息太子舅趙
常奴怙勢橫閭里朝隱執而榜辱之帝賜書慰勉授岐州刺史召
為揚州都督府長史還為大理卿出為嶺南採訪處置使卒於官

謚曰貞

唐書
本傳

宇文融萬年人祖節明法令謹幹自將永徽初遷黃門侍郎同中書

門下三品融明辯長於吏治開元初由監察御史擢兵部員外郎兼侍御史奏慕容琦等二十九人爲勸農判官假御史分按州縣括正邱畝招徠戶口於是諸道收沒戶八十萬田亦稱是歲終羨錢數百萬緡帝悅拜御史中丞融乃自請馳傳行天下事無巨細先上勸農使而後上臺省臺省須其意乃行下融所過宣天子恩旨百姓至有感涕者使還言狀帝乃下詔以客賦所在並建常平倉益貯九穀權發斂官司勸作農社使貧富相恤凡農月州縣常務一切罷省使趨刈獲流亡新歸十道各分官屬存撫使遂厥功復業已定州縣季一申牒不須挾名出爲魏州刺史河北大水詔領宣撫使俄兼檢校汴州刺史入爲鴻臚卿明年進黃門侍郎同平章事司農發融在汴給隱官息錢巨萬詔流巖州道卒子審融之貶也審與兄弟待母京師及聞融再貶徒步號泣省父後擢進

士第累遷大理評事以夏楚大小無制始創杖架以高庠度杖長短又鑄銅爲規齊其巨細楊國忠專政殺嶺南人畏議者嫉其酷乃以審爲監決處置等使活者甚衆終和永二州刺史

唐書本傳

楊慎矜

華陰人

隋齊王暕曾孫父隆禮歷州刺史以嚴辯名開元初爲

太府卿時御府財物羨積如山隆禮性詳密出納皆自按省凡物經楊卿者無不精麗歲常省數百萬以戶部尚書致仕卒慎矜沉毅任氣健而才初爲汝陽令有治稱隆禮罷太府元宗訪其子可代父任者宰相以慎餘慎矜慎名皆得父清白帝喜擢慎矜監察御史知太府出納慎餘太子舍人主長安倉慎名大理評事爲含嘉倉出納使被眷尤渥慎矜遷侍御史知雜事高置風格始議輸物有汙傷責州縣償所直轉輕齊入京師自是天下調發始煩天寶二年權御史中丞兼諸道鑄錢使擢戶部侍郎仍兼中丞明年

慎矜父冢草木皆流血懼以問所著胡人史敬忠敬忠使厭之王

鉞李林甫作飛牒告慎矜有詔賜死

唐書本傳

第五琦字禹珪長安人少以吏幹進頗能言彊國富民術賀蘭進明才之奏為錄事參軍肅宗駐彭原進明遣琦奏事帝悅拜監察御史勾當江淮租庸使遷諸道鹽鐵鑄錢使當軍興隨事趣辦人不益賦而用以饒乾元二年進同平章事貶忠州長史寶應初起為朗州刺史有異政拜太子賓客改京兆尹加判度支鑄錢鹽鐵轉運常平等使坐與魚朝恩善貶括州刺史德宗素聞其才將復用

會卒

唐書本傳

路嗣恭字懿範三原人為蕭關令連徙神烏姑臧二縣考績為天下

最轉渭南令主杜化東陽二驛時關畿用兵使人係道嗣恭儲具

有素而民不擾後為郭子儀朔方節度留後大將孫守亮

受制嗣恭因稱疾守亮至即殺之一軍皆震永泰三年檢校刑部尚書知省事出爲江西觀察使以善治財賦稱大曆八年嶺南將哥舒晃殺節度使五嶺大擾詔嗣恭兼嶺南節度使嗣恭募勇敢士八千人由間道出不意斬晃及支黨萬餘俚洞魁宿爲惡者皆族夷之拜東都留守卒子應恕應字從衆以廕爲著作郎累遷宣歙觀察使李錡反應發鄉兵救湖常二州錡不能拔元和六年授左散騎常侍卒諡曰靖恕字體仁從嗣恭討哥舒晃賊平恕功多累遷鄜坊宣歙觀察使以右散騎常侍致仕

唐書本傳

柳子華

華原人

公綽諸父始辟嚴武劍南府累遷池州刺史代宗將幸

華清先命完葺以子華爲昭應令檢校金部郎中修宮使設棘圍於市徇邑中曰民有得華清宮瓦石材用投圍中踰三日不還者死不終日已山積營辦畧足宰相元載有別墅以奴主務自稱郎

將怙勢縱暴租賦未嘗入官子華因奴入謁收付獄杖殺之一邑

震伏載不敢怨子公度善攝生年八十餘有強力

唐書柳公綽傳

蕭定字梅臣

瑀曾孫長安人

以廕起家陝州叅軍事金城丞蒞事清挺選補

黜陟使裴遵慶表為判官還調萬年主簿歷左右司郎中為元載

所惡外遷袁潤等六州刺史大曆中有司差天下刺史治最定與

常州蕭復濠州張鎰為第一而劾桑稼均賦稅業徠游口在鎰復

右遷戶部侍郎太常卿朱泚反詭姓名為張誕匿里中不浼於賊

事平擢太子少師卒

唐書蕭瑀傳

韓滉字大冲

休子長安人

廕補左威衛騎曹叅軍性彊直明吏事蒞南曹

五年簿最詳緻再遷右丞知吏部選以戶部侍郎判度支德宗立

遷浙江東西觀察使尋檢校禮部尚書為鎮海軍節度使綏輯百

姓均租調不踰年境內稱治帝在奉天滉訓士卒分兵戍河南

狩梁州又獻縑十萬匹請以鎮兵三萬助討賊有詔嘉勞進檢校
尚書右僕射滉聞京師未平調發糧帛以濟朝廷當時實賴之李
晟方屯渭北滉運米饋之漕船臨江滉顧僚吏曰天子蒙塵臣下
之恥乃自舉一囊將佐爭負之貞元元年加檢校左僕射同平章
事江淮轉運使封鄭國公更封晉卒諡曰忠肅子羣臯羣終國子
司業臯字仲間由雲陽尉歷東都留守忠武軍節度使大抵以簡
儉治所至有績拜吏部尚書進左僕射卒諡曰貞洄字幼深滉弟安祿
山亂避難江南乾元中授睦州別駕德宗即位復為諫議大夫擢
戶部侍郎判度支洄上言天下銅鐵乃山澤利當歸王者請悉隸
鹽鐵使從之復罷省胥史冗食二千人積米長安萬年二縣各數
十萬石視年豐耗而發斂焉故人不艱食終國子祭酒唐書韓休傳
韋夏卿字雲客萬年人少邃於學善文辭大曆中與弟正卿同舉賢

良方正皆策高等累遷刑部員外郎授奉天令課第一後為吏部侍郎時從兄執誼在翰林受人金有所干請密以金納夏卿懷中夏卿毀懷不受曰吾與爾賴先人遺德致位及此顧當如是哉執誼大慚改太子少保卒謚曰獻夏卿為政務通理不甚作條教所辟士多至宰相達官世稱知人正卿子瓘字茂弘桂管觀察使

唐書

本傳

奚陟字殷卿京兆人少篤志通羣書大曆末擢進士授校書郎居親喪毀瘠過禮歷遷中書舍人江南淮西皆大水詔陟勞問循慰所至人人便安中書吏倚宰相勢陟遇之無假借雖細務皆身親久益強力人以為難遷刑部侍郎京兆尹李充有美政裴延齡誣劾充逮繫榜掠甚急陟持平具獄上充免進工部尚書謚曰憲

唐書本傳

王紹自太原徙京兆父端第進士有名天寶間終工部員外郎紹少

為顏真卿所器奏為武康尉包佶領租庸鹽鐵使署判官時李希烈阻兵江淮輸物留梗乃徙餉道自潁入汴紹入關德宗已西狩乃督輕貨趨間道走洋州見行在由是紆難遷倉部員外郎頃之遷尚書元和初檢校尚書右僕射為武寧軍節度使蒐輯軍政推誠示人裨將安進達唐重靖謀亂紹以計取之出家貲賞士舉軍

安賴拜兵部尚書判戶部卒諡曰敬

唐書本傳

嚴綬

挺之從孫華陰人

擢進士第以侍御史副劉贊為宣歙團練使贊卒綬

總留事悉庫物以獻召為刑部員外郎河東軍司馬鄭儋為節度德宗頗憶綬所獻擢河東司馬儋卒代其使在鎮九年尚寬惠治稱流聞士馬孳息嘗大閱旗幟周七十里回鶻梅錄將軍在會聞金鼓震伏入為尚書右僕射吳元濟反徙山南東道節度使加淮西招撫使召還進太傅卒綬才不踰中人然歷三鎮所奏辟及綬

時位將相者九人河東李進賢為振武節度使辟綬子澈為判官

澈年少治苛刻軍中苦之乃殺澈

唐書嚴挺之傳

徐申字維降京兆人擢進士第累遷韶州刺史韶自兵興四十年刺史以縣為治署令丞雜處民間申按公田之廢者募人假牛犁墾發田久不治故肥美歲入凡三萬斛乃徙治故州未幾邑閑如初始來韶戶止七千比六年倍而半之會初置景州授刺史賜錢五十萬加節度副使進嶺南節度使前使死吏盜印署府職百餘員畏事泄謀作亂申覺殺之誑誤一不問外蕃歲以珠璣瑁香文犀浮海至申於常貢外未賞贍索商賈饒盈加檢校禮部尚書封東海郡公卒諡曰平

唐書本傳

任迪簡萬年人擢進士第天德李景畧表佐其軍軍中悅其長者景畧卒舉軍請為帥監軍使拘迪簡不聽眾大呼破戶出之德宗遣

使察變具得所以乃授豐州刺史天德軍使入爲太常少卿太子左庶子張茂昭以易定歸廸簡以檢校工部尚書爲節度使承茂昭奢縱後公私屈乏欲饗士無所給至與下同糲食踰月軍中感其公三年上下完充以疾入除工部侍郎卒諡曰襄

唐書本傳

杜佑字君卿萬年人以廕補剡縣丞嘗過潤州刺史常元甫有疑獄不決試訊佑佑爲辨處契要無不盡元甫奇之署司法叅軍入爲工部郎中楊炎輔政改度支兼和糴使於是軍興餽漕佑得剴決以戶部侍郎判度支俄遷嶺南節度使疏析廛閭以息火災朱崖黎氏三世不賓佑討平之召拜尚書右丞俄出爲淮南節度使決雷陂以廣灌溉斥海瀕棄地爲田積米五十萬斛列營三十區士馬整飭四鄰畏之拜檢校司空同平章事德宗崩詔攝冢宰進檢校司徒兼度支鹽鐵使始度支舊用度多署吏權攝百司繁而不

綱佑以營繕還將作木炭歸司農凍染還少府職務簡脩明年拜

司徒封岐國公致仕卒諡曰安簡佑天性精於吏職議者稱治行

無缺云

唐書本傳

常武

待價曾孫萬年人

少孤年十一補右千牛累遷長安丞德宗幸梁州委

妻子奔行在除殿中侍御史轉刑部員外郎是時帝以反正告郊

廟大兵後典章苟完執事者時時咨武武酌宜約用得禮之衆羣

司奉焉後為絳州刺史鑿汾水灌田萬三千餘頃墾書勞勉憲宗

時入為京兆尹卒

唐書韋挺傳

柳公綽字寬華原人幼孝友性質嚴重舉直言極諫授渭南尉歲歉

饑其家雖給每飯不過一噐或問之答曰四方病饑獨能飽乎召

為吏部郎中憲宗數出游畋公綽奏大醫箴以諷天子高其才拜

御史中丞出為湖南觀察使徙鄂岳時方討吳元濟詔發鄂岳兵

五千隸安州刺史李聽公綽請自行許之三軍出公綽數省問其
家疾病生死厚給之軍中感服鄂軍每戰輒克拜京兆尹方赴府
有神策軍校乘馬不避者即時榜死帝怒其專殺公綽曰此非獨
試臣乃輕陛下法俄檢校戶部尚書山南東道節度使行部至鄧
縣吏有納賄舞文二人同繫獄縣令以公綽素持法謂必殺貪者
公綽曰賊吏犯法法在姦吏壞法法亡誅舞文者入爲刑部尚書
俄拜邠寧節度使先時神策諸鎮列屯部中不聽本道節制故虜
得窺間公綽論所宜屯營緩急悉受節度復爲刑部尚書京兆獄
有姑鞭婦至死者府欲殺之公綽曰尊毆卑非鬪也且子在以妻
而戮其母不順遂減論太和四年爲河東節度遭歲惡樽節用度
輟宴飲衣食與士卒均以病乞代授兵部尚書忽顧左右召故吏
常長衆謂委以家事及長至乃曰爲我白宰相徐州專殺李聽親

吏非用高瑀不能安因瞋目卒諡曰元子仲郢幼嗜學長工文元和末及進士第爲校書郎會昌初累轉吏部郎中遷左諫議大夫武宗延方士築望仙臺累諫諄切帝遣中人愧諭拜京兆尹置權量於東西市使貿易用之禁私製者北司吏入粟違約仲郢殺而尸之自是人無敢犯政號嚴明宣宗初授河南尹以寬惠爲政或言不類京兆時答曰輦轂之下先彈壓郡邑之治本惠養烏可類乎擢劍南東川節度使大吏邊章簡挾勢肆貪前帥不能治仲郢因事殺之官下肅然居五年詔爲吏部侍郎俄改兵部領鹽鐵轉運使大中十二年罷使咸通五年爲天平節度使卒於鎮子珪璧玼珪字交元大中中與璧繼擢進士皆秀整而文終衛尉少卿璧字賓王馬植鎮汴州辟管書記又從李璣桂州規正其不法璣不聽乃拂衣去未幾軍亂擢右補闕累遷右諫議大夫玼以明經進

秘書正字擢刑部員外郎出爲嶺南節度副使文德元年以吏部

侍郎修國史拜御史大夫直清有父風

唐書本傳

蘓弁字元容

世長從孫武功人

擢進士調奉天主簿德宗出狩縣令計事在

府官屬皆惶恐欲遁走弁曰昔肅宗幸靈武至新平安定二太守坐伏匿斬諸君知之乎衆乃定車駕至儲侍畢給帝嘉之試大理司直朱泚平進監察御史擢累倉部郎中判度支案裴延齡死召見延英賜紫衣金魚以度支郎副知度支事弁通學術吏事精明承延齡後平賦緩役畧煩苛人賴其寬久之遷戶部侍郎判度支改太子詹事坐前以腐粟給邊貶汀州司戶參軍數年起弁爲滁

州刺史卒

唐書蘇世長傳

馬總字會元系出扶風少孤寡不妄交游貞元中辟署滑州姚南仲幕府元和中以虔州刺史遷安南都護廉清不撓用儒術教其俗

政事嘉美獠夷安之十二年副裴度宣慰淮西吳元濟禽爲彰義節度留後蔡習僞惡總爲設教令明賞罰磨治洗汰其俗一變始奏改彰義爲淮西擢淮西節度使徙天平入爲戶部尚書卒諡曰

懿

唐書本傳

楊於陵字達夫本漢太尉震之裔擢進士調句容主簿入爲郵部員外郎德宗聞其名拜中書舍人遷浙東觀察使越人饑請出米三十萬石贍貧民政聲流聞入爲京兆尹先是編民多竄北軍籍中倚以橫閭里於陵請限丁制減三丁者不得著籍姦人無所影賴京師豪右大震遷戶部侍郎出爲嶺南節度使教民陶瓦易蒲屋以絕火患監軍許遂振悍戾貪肆憚於陵不敢撓以私爲飛語聞京師有詔罷歸授吏部侍郎穆宗立以尚書左僕射致仕於陵量方峻節操堅明始終不失其正時人尊仰之卒贈司空諡曰貞

子景復同州刺史紹復中書舍人師復大理卿嗣復位宰相

唐書本傳

嗣復字繼之擢進士博學宏詞善禮家學遷禮部員外郎與牛僧儒李閔宗雅相善二人輔政引之權知禮部侍郎俄同平章事武宗之立非宰相意故用李德裕而罷嗣復貶潮州刺史宣宗立以吏部尚書召道卒子授損授字得符於昆弟最賢由進士第遷累刑部尚書從昭宗幸華徙太子少保損字子嘿由廕補藍田尉遷給事中陝虢軍亂逐節度使崔勣命損代之至則盡誅有罪者徙

天平卒

唐書楊嗣復傳

常丹字文明萬年人高祖琨以洗馬事太子承乾諫不聽太宗才之擢給事中孝敬為太子琨以右中護為詹事卒諡曰貞丹從外祖顏真卿學舉五經高第歷咸陽尉拜容州刺史教民耕織止惰游興學校民貧自鬻者贖歸之禁吏不得掠為隸屯田二十四所教

種茶麥仁化大行以諫議大夫召有直名拜江南西道觀察使丹計口受俸委餘於官罷八州冗食者收其財始民不知爲瓦屋丹召工教爲陶聚材於場度其費爲估不取贏利人能爲屋者受材瓦於官免半賦貧不能者畀以材置南北市爲營以舍軍歲中旱募人就功厚與直給其食爲衢南北夾兩營東西七里以廢倉爲新廩馬息不死築堤扞江長十二里爲陂塘五百九十八所灌田萬二千頃有吏主倉十年丹覆其糧亡三千斛丹籍其家盡得文記乃權吏所奪丹召諸吏期一月還之及期無敢違卒年五十八子宙爲永州刺史州方災歉乃斥官下什用所以供刺史者得九十餘萬錢爲市糧餉俗不知法多觸罪宙爲書制律并種植爲生之宜戶給之州負嶺轉餉艱險宙始築常平倉收穀羨餘以待乏罷冗役九百四十四員湘源生零陵香歲市上貢人苦之宙奏罷

民貧無牛以力耕田爲置社二十家月會錢若干採名得者先市牛以是爲準久之牛不乏立學官取仕家子弟十五人充之禮俗遂改還爲大理少卿久之拜江西觀察使遷嶺南節度使南詔陷交趾撫兵積備以幹聞加檢校尚書左僕射同平章事咸通中卒弟岫字伯起亦有名擢福建觀察使

唐書本傳

程异字師舉長安居鄉以孝稱第明經再補鄭尉精吏治李異領鹽鐵薦异心計可任稍遷淮南等道兩稅使异厲已竭節悉革征利舊弊遷鹽鐵轉運副使方計蔡异使江表調財用因行諭諸帥府以羨贏貢故所至不剝下不加斂經用以饒元和十三年以工部侍郎同平章事猶領鹽鐵异自以非人望久不敢當印秉筆明年議置巡邊使憲宗問孰可者乃自請行會卒諡曰恭身歿官第

無留貲世重其廉云

唐書本傳

李愿

晟子萬年人

元和初領夏綏銀宥節度使政簡而嚴部有失馬者愿

署牒於道以金購之三日失馬並良馬一繫署下且曰逸而至不

告罪當死以良馬一贖愿歸失馬而縱其良境內肅然徙武寧軍

會伐青鄆數有功以久疾用愬代之詔爲刑部尚書俄檢校尚書

左僕射節度鳳翔自是邇聲色而政衰矣後拜河中晉絳等節度

使卒弟憲任醴泉尉遷衛州刺史以治行稱徙絳州絳有幻人怵

民以亂憲執誅之河中兵本仰食於絳而汾可輸河渭歲租與羅

常數十萬石故教保山爲固民之輸者十牛不勝一車憲濱汾相

地治新倉當費二百萬請留垣縣粟糶河南以錢還糶絳粟既免

負載勞又權其贏以完新倉絳人頗利入爲宗正少卿副金吾大

將軍胡

爲送太和公主使遷嶺南節度使所歷皆以吏能顯政

績暴著善治律令性明恕詳正大獄活無罪者數百人卒官

正思七歲廕爲協律郎吐突承璀討王承宗以聽爲神策行營兵馬使斬賊驍將承璀數問聽計卒縛盧從史遷左驍衛將軍出爲蔚州刺史州有銅冶聽開五爐鑄錢柳公綽討蔡以聽典軍一一咨之詔爲羽林將軍帝討李師道出爲楚州刺史聽掩賊不虞趨漣水破沐陽遂取海州攻朐山降之懷仁東海兩城望風送款以功兼御史大夫夏綏銀宥節度使又徙靈鹽部有光祿渠久廢聽復屯田以省轉餉引渠溉塞下地千頃穆宗初立授檢校兵部尚書充河東節度使敬宗嗣位改義成軍太和初魏博將丁志沼反擊其帥史憲誠詔聽出援擊殺志沼以功封涼國公兼帥魏博聽遷延不即赴魏遂亂殺憲誠罷爲太子少師開成初爲河東節度使文宗歎曰付之兵不疑退處散地不怨唯聽爲可拜太子太保卒子琢以家閥累擢節度使廣明時沙陀盜邊琢爲宿將拜都統

行營節度使坐逗撓下遷刺史卒

唐書李晟傳

崔俊字德長

長安人

祐甫從子性介潔視賊負者若讐以蘓州刺史奏

課第一遷湖南觀察使湖南舊法貿易不出境鄰郡災荒不恤也

俊至削其禁自是商賈流通貨物益饒入為戶部侍郎判度支

唐書

崔沔傳

令狐楚

德棻後裔華原人

貢進士累擢職方員外郎知制誥其為文於牋奏

制令尤善為華州刺史擢河陽節度使代烏重引重引徙滄州以

河陽士三千從士不樂半道潰歸將掠旁州楚以數騎自往勞之

斬其首惡眾遂定穆宗即位進門下侍郎方營景陵詔楚為使出

為宣歙觀察使遷宣武節度使汴軍驕韓弘峻法繩治楚至解去

酷烈以仁惠鐫諭人人悅喜徙天平召為吏部尚書進拜左僕射

彭陽郡公是時政在宦豎數上疏辭位拜山南西道節度使卒諡

曰文子緒綯緒歷隋汝壽三州刺史有佳政綯擢進士累擢湖州刺史大中初召入爲翰林學士遷御史中丞俄同平章事懿宗嗣位爲河中節度使徙淮南安南平以饋運勞封涼國公僖宗立拜鳳翔節度使徙封趙卒楚弟定桂管觀察使

唐書本傳

竇易直字宗元始平人擢明經補校書郎累遷吏部郎中元和六年進御史中丞由陝虢觀察使入爲京兆尹貶金州刺史起爲宣歙浙西觀察使時江淮部將王國清激衆謀亂易直知之械國清送獄其黨數千篡取之欲大剽易直登樓令曰能誅亂者一級賞千萬衆喜反縛爲亂者三百餘人易直悉斬之入爲戶部侍郎判度支同中書平章事文宗立檢校尚書右僕射頃之檢校司空爲鳳翔節度卒諡恭惠易直以公潔自喜方執政未嘗引用親黨

唐書本傳

盧鈞字子和系出范陽徙藍田舉進士中第補秘書正字遷御史中丞

華州刺史關輔驛馬疲耗鈞爲市健馬率三歲一易自是無乏事
擢嶺南節度使時稱潔廉蕃獠與華人錯居相婚嫁多占田營第
舍吏或撓之則相挺爲亂鈞下令不得通婚禁占田產闔部無敢
犯貞元後流放衣冠其子姓窮弱不能自還者以俸稟資助凡數
百家又除采金稅會昌中漢水害襄陽拜山南東道節度使築隄
以障漢暴王師伐劉稹武宗以鈞寬厚能得衆詔兼節度昭義軍
宣宗即位節度河東大中九年召爲左僕射帝元日大饗含元殿
鈞年八十升降如儀音吐鴻暢帝以鈞同平章事爲山南西道節
度使懿宗初以太保致仕卒諡曰元鈞與人交始若澹薄既久乃
益固所居官必有績大抵根仁恕至誠而施於事位將相沒而無

贏財

唐書本傳

帝正貫字公理

韋弟

子舉賢良方正異等進壽州團練使宣宗立以

萬年人

治最拜京兆尹俄擢嶺南節度使南海舶買始至大帥必取象犀明珠上珍而售以下直正貫既至無所取吏咨其清南方風俗右鬼正貫毀淫祠教民無妄祈會海水溢人爭咎撤祠事正貫登城沃酒以誓曰不當神意長人任其咎無逮下民俄而水去民乃信之居鎮三歲卒

唐書韋臯傳

杜審權字殷衡

元絳子杜陵人

第進士官宗時入翰林為學士累遷兵部侍郎

出為鎮海軍節度使龐勛反審權與令狐綯連師犄角饋粟相銜王師賴濟勛破進檢校司空繼領河中忠武節度使卒贈太子

太師諡曰德

唐書杜如晦傳

蕭倣字思道

悟子長安人

太和中擢進士第除累給事中宣宗嘗以李璣

為嶺南節度使使者已賜節而倣封還詔書令狐綯用李璣經畧安南璘以暴虐免俄起為壽州團練使倣劾奏璘無所回時推其

直自集賢學士拜嶺南節度使南方珍賄叢夥不以入門家人病
取槁梅於厨以和劑倣知趣市還之咸通初爲左散騎常侍懿宗
怠政事喜佛道引桑門入禁中爲禱祠事數幸佛廬廣施予倣諫
以爲天竺法割愛取滅非帝王所尚募帝雖昏縱猶嘉歎其言後
官數遷拜義成軍節度使滑州瀕河累歲水壞西北防倣徙其流
遠去樹堤自固人得以安以兵部尚書再判度支進中書侍郎同
平章事再遷司空蘭陵縣侯時天下盜起宦人持兵柄倣以鯁直
爲權近所忌卒年八十子廩字富侯第進士遷尚書郎倣嶺南海
解官往侍爲人退約少合南海多穀紙倣敕諸子繕補殘書廩諫
曰州距京師且萬里書成不可露齎必貯以囊笥貪者伺望得無
意茲嫌乎倣曰善吾思不及此乃止廣明初以諫議大夫知制誥
請厲止夜行以備賊謀出太倉粟賤估以濟貧民俄遷京兆尹田

令孜養子有罪捕吏繫獄請救踵門廩不納杖殺之內外畏讐令孜拒黃巢以廩為糧料使辭疾貶賀州司戶叅軍事會襄王竊據挈族逃河朔卒

唐書蕭瑀傳

楊發字至之

收兄馮翊人

登進士又中拔萃累官左司郎中宣宗追加順

憲二宗尊號有司議改造廟主發執不可知禮者躡之改太常少卿為蘓州刺史治以恭長慈幼為先尋徙福建觀察使又以能政聞弟假常州刺史儼兵部侍郎子陟注陟哀帝時同平章事以謙靖免於禍注戶部侍郎

唐書本傳

宋

楊克讓字慶孫馮翊人高祖公畧洪州都督克讓歷鳳翔司錄參軍母老解官歸養太祖素知其名起為左補闕開寶三年命為西川轉運副使蜀民懷其善政璽書褒美代歸闕下疏民利病十事稱

旨太平興國初爲兩浙西南路轉運使泉州民嘯聚爲盜克讓討平之四年徙知廣州俄兼轉運市舶使明年卒克讓少好學歷官蕪謹幹局所至有聲當時稱爲能吏子希閔字無間經史歷耳不忘屬文善絨尺有集二十卷自教三子日華日嚴日休皆登進士第希甫從子日宣亦登進士

宋史本傳

邊珣字待價華州人曾祖頡石泉令祖操下邳令父蔚太常卿珣晉天福六年舉進士周顯德年知通州課鬻鹽於狼山歲增萬餘石宋建隆二年兄玠自河南令爲吏部員外復以珣爲洛陽令開寶初遷職方郎中監京兆麴務又掌永安軍權貨奏徙務揚州有富民訴廣陵尉謝圖殺其父本部收尉囚之官吏推劾累三百日獄未具狀聞詔珣案鞫盡得其實乃富民誣告即反坐之就命權知州事太宗即位克廣南轉運使太平興國七年移知開封府明年

卒珮精力有吏材帝方欲倚用及聞其卒歎惜數四賻其家絹四百匹錢二十萬以其從子俊爲尉氏主簿兄玘至金部郎中弟玠右贊善從子倣至殿中丞倚爲比部員外郎

宋史本傳

宋璫字寶臣渭南人父鸞監察御史璫乾德中進士及第拔萃登科解褐青城主簿知綿州太宗即位改右贊善大夫出知秦州有善政就拜監察御史充陝西轉運使以常亶代知秦州未百日坐事繫獄上以璫前有治績再命知秦州安集諸戎部內清肅雍熙初遷屯田郎中知益州屬歲饑多盜璫始至以方畧擒捕招輯盜皆屏息淳化中知蘓州卒上聞之嗟悼錄其子明遠爲蒲城主簿俾護其喪歸葬焉璫性清簡歷官三十年未嘗問家事唯聚書以貽子孫且曰使不忘本也次子柔遠亦舉進士

宋史本傳

師顏字霄遠內黃人父均後唐長興二年進士終永興節度判官因

家關右顏少篤學建隆二年舉進士上第解褐耀州軍事推官累
殿中侍御史知資善二州所至以簡靜為治蜀人便之超拜工部
郎中知陝州真宗以其素負才望而久次於外累詔對詢其文章
命以本官知制誥咸平五年知審官院通進銀臺封駁司俄卒宋史
本傳

段鵬京兆人太平興國三年知興化縣擢知興化軍轉運使以游洋
轉輸不便奏請移治於莆鵬覽視形勝以都巡檢解為軍治借民
力而民不怨後論創始者稱段知軍云福建志

宋濤溫舒子端拱二年進士知襄城縣以政績聞宋史宋濤傳

趙湘字巨源華州人進士甲科歷彰武永興昭武三軍節度推官遷
著作佐郎知新繁縣以吏最命知商州徙隴州興元府上補政
言十篇詔判宗正寺賜白金二百兩真宗東封泰山為東京留守

推官禮成遷侍御史昇州火命湘往致祠兼問民疾苦還言轉運使劉照弛職知洪州馬景不任事皆罷黜之再遷工部郎中出知

河南府以疾徙虢州卒

宋史本傳

李仕衡字天均成紀人家京兆進士及第調鄠縣主簿田重進守京兆命仕衡鞠死囚五人活四人重進即其家謂曰子有陰施此門當高大之徙知彭山縣遷知劍州擢尚書度支員外郎判三司鹽鐵勾院度支使梁鼎言商人入粟

以解鹽商

利益博國用日耗請調丁夫轉粟而輦鹽諸州官自鬻之歲可得緡錢三十萬仕衡曰安邊無大於息民今增以轉粟輓鹽之役欲其不困何可得哉不聽遂行鼎議而關中大擾乃以仕衡爲荊湖北路轉運使徙陝西真宗幸洛召爲度支副使上言關右既弛鹽禁而永興同華耀四州猶率賣鹽年額錢請減十之四詔悉除之

爲河北轉運使建言河北歲給諸軍帛七十萬而民艱於得錢預假於里豪出倍償之息故工機之利愈薄方春民不足請戶給錢至夏輸帛則民獲利而官用足矣詔優其直仍推其法於天下以爲河北都轉運使盜起淄青間遷知青州前守捕羣盜妻子寘棘圍中仕衡至悉縱之未幾其徒有梟賊首至者仁宗即位拜尚書左丞以足疾改同州觀察使卒子丕緒蔭補將作監主簿及仕衡歸老時爲虞部員外郎請解官就養累遷司農卿致仕卒丕緒居官廉靜不爲矯激家多圖書集歷代石刻爲數百卷藏之

宋史本傳

李行簡字易從馮翊人家貧刻志於學每至夜分寒暑不易又聚木葉學書筆法遒勁與里中富人楊志元同學同時中進士第士元資遺謝不取起家隴州司理叅軍徙彭州軍事推官陵州富民陳子美父死繼母詐爲文書逐之累訴不得直行簡劾正其獄遷

御史陝西旱蝗命往安撫發倉粟救乏絕又蠲耀州積年逋租擢龍圖閣待制帝數幸龍圖閣命講周易間訪大臣能否行簡無怨眎各道所長人以爲長者乾興初改給事中以足疾請外知河中

府徙虢州卒

宋史本傳

李若拙字藏用萬年人舉進士擢上第授密州防禦推官登賢良方正直言極諫科太祖嘉其敏贍改著作佐郎遷知隴州以政聞雍熙三年假秘書監使交州先是黎桓制度踰僭若拙入境遣左右戒以臣禮由是桓聽命拜詔盡恭燕饗日以奇異列前若拙一不留眄取先陷蠻使鄧君辨以歸使還上謂其不辱命遷起居舍人淳化二年出爲兩浙轉運使徙江南若拙尚氣有幹才然臨事太緩宰相以爲言罷使知涇州至道二年黎桓復侵南鄙又詔若拙充使桓復稟命使還真宗嗣位詔試學士院俄知制誥咸平初使

河朔按邊事知昇貝二州卒子繹字縱之幼謹愿自修舉進士中
第除將作監丞累遷屯田員外知華州蒲城民李蘊訴人盜其從
子亡去繹因密刺蘊蘊有陰罪侄覺之懼事暴殺之以滅口遂收
蘊致法擢提點河北刑獄權知貝州歲旱繹爲酒務市民薪草濫
常數餓者皆以樵採自給得不死官入亦數倍邊民歲輸草十餘
萬委積久輒腐敗繹奏罷之三遷本曹郎中改兵部爲江淮制置
發運使內出絹五十萬匹責貿於東南繹曰百姓饑不宜重擾輒
奏罷之甫半年漕課視常歲增五之一繹自以久宦在外意不自
得作五知先生傳謂知時知難知命知退知足也爲右諫議大夫

卒

宋史
本傳

閻詢字議道天興人少時以學問著聞擢進士第又中書判拔萃科
累遷鹽鐵判官使契丹詢頗諳北方疆理時契丹在乾定近者

惠導詢由松亭往詢曰此松亭路也胡不徑慈嶺而迂枉若是豈
非夸大國地廣以相欺耶惠慚不能對加直龍圖閣知梓州徙河
東轉運使言三路士兵疲老者聽其族以強壯者代從之進集賢
殿修撰知河中府大河漲壞浮橋詢易爲長橋拜天章閣待制轉
右諫議大夫知邠同二州提舉上清太平宮卒

宋史
本傳

范祥字晉公三水人進士及第自乾州推官稍遷殿中丞通判鎮戎
軍元昊圍城急祥帥將士拒退之歷知慶汝華三州提舉陝西銀
銅坑冶鑄錢祥曉達財利建議變鹽法後人不敢易稍加損益人
輒不便累遷度支員外郎權轉運副使改制置解鹽使卒嘉祐中
包拯言祥通陝西鹽法行之十年歲減權貨務緡錢百萬其勞可
錄熙寧中權陝西轉運副使張詵奏朝廷復洮隴故地自將帥至
裨佐悉有功賞臣見洮渭父老言皇祐中轉運使范祥因熟羌數

被寇掠其部族願輸土置城以爲守禦乃即古渭爲砦消沮邊隙
可謂知守攻之利冀推原舊功少賜褒卹使天下知祥死猶被恩
且舒祥忠義之氣詔贈秘書錄一子子育字吳之舉進士爲涇陽
令以養親歸從張載學有薦之者召見授崇文校書監察御史裏
行神宗諭之曰書稱聖讒說殄行此朕任御史意也育因薦張載
等數人知河中府加直集賢院徙鳳翔以直龍圖閣鎮秦州元祐
初詔爲太常少卿改光祿卿都承旨出知熙州時議棄質孤勝如
兩堡育爭之曰熙河以蘭州爲要塞此兩堡者蘭州之蔽也棄之
則蘭州危蘭州危則熙河有腰膂之憂矣又請城李諾平汝遮川
曰此趙充國屯田古榆塞之地也不報入爲給事中戶部侍郎卒
紹興中採其抗論棄地西夏及進築之策贈寶文閣學士

呂大忠字進伯

大防兄
藍田人

登第爲華陰尉晉城令韓絳宣撫陝西以大

宋史范
祥本傳

忠提舉永興路義勇改秘書丞大忠言養兵猥衆國用日屈漢之屯田唐之府兵善法也弓箭手近屯田義勇近府兵擇用其一兵屯可省爲簽書定國軍判官會遭父喪起復知代州契丹使蕭素梁穎至代大忠數與素穎會議屢以理折之元祐初歷工部郎中陝西轉運副使知秦州時郡糴民粟豪家因之制操縱之柄大忠選寮案自旦入倉雖斗升亦受不使有所壅闕民喜爭運粟於倉負錢而去得百萬斛紹聖三年加寶文閣直學士知渭州付以秦渭之事徙知同州旋降待制致仕卒詔復學士官佐其葬

宋史呂
大防傳

李處訥同州人爲郡守時稱循吏

賈志

張汝明鳳翔人神宗時爲漢陽軍判官時行公田法授牒按境內躬臨閱實雖雨雪不渝由是吏不得通賄而稅均於一

湖廣志

李周字純之馮翊人登進士第調長安尉歲饑官爲粥以食餓者民

至集不可禁縣以屬周周設控扼間老少男女無一亂者轉洪洞
令縣南有澗支流溢入歲賦菑健調徙遇之周始築新堤民不告病
改知雲安縣蠲鹽井之征百萬通判施州州介羣獠不習服牛之
利為辟田數千畝選謫戍知田者市牛使耕軍食以足哲宗立召
為職方郎中遷直龍圖閣為陝西轉運使以集賢院學士知邠州
徙鳳翔府改集賢殿修撰卒

宋史本傳

畢仲衍字夷仲

士安曾孫華州鄭人

以廕為陽翟主簿張昇縣人也方鎮許請

於朝欲興鄉校具材計工聽民自以其力輸助邑子馬宏以口舌
橫閭里謾謂諸豪曰張公興學縣令因取諸民由十百至千萬未
已也誠捐百金予我我能止役豪信其能予百金宏即詣府宣言
縣吏盡私為學之費又將賦於民昇果疑敕縣且止又揭其事於
道令欲上疏辯仲衍曰亡益也取宏治之不辯自直矣會攝縣事

即逮捕驗治五日得其姦言於昇流宏鄧州一縣相賀舉進士中

第調沈邱令以秘閣校理同知太常禮院擢起居郎暴疾卒仲游
字公叔與仲衍同登第調環慶轉運司幹辦公事從高遵裕西征
運期迫遽陝西輓夫三十萬一旦悉集轉運使范純粹李察會僚
屬議皆不知所爲以委仲游仲游集諸縣吏令先効金帛緡錢之
最戒勿啟扁鐫共簿其名數以爲質預飭斛量數千洞徹倉庾墻
壁使贏糧者至其所人自斟酌輸其半而以半自給不終朝霍然
而散翊日大軍遂行元祐初召試學士院擢第一加集賢校理出
提點河東路刑獄韓縝以故相在太原按視如列郡縝奴告有卒
剽其衣於公堂之側縝怒將寘卒於理仲游曰奴衣尠薄而敢掠
之於帥牙非情也以付獄治卒得免太原銅器名天下獨不市一
物懼人以爲矯且行買二茶匕而去縝曰如公叔可謂清矣改秘

閣校理知耀州是歲大旱仲游先民未饑揭諭境曰賑施與平糶若干萬石富室知有備相勸發廩民就食者十七萬九千口無一人去其鄉徽宗時歷吏部郎中墮黨籍坎壈而終弟仲愈歷知鳳

翔府擢秘書少監卒

宋史畢士安傳

韓彥直字子溫

世忠子延安人

以父任補右承奉郎調大社令出爲浙東安

撫司主管機宜文字乾道二年遷戶部郎官總領淮東軍馬錢糧會大軍倉給糧察給米不如數捕吏寘於理初代緡錢僅二十萬明年奏計乃四倍帝嘉之拜司農少卿權知江州時相密啟換武援鄂州駐劄都統制條奏軍中六事乞備器械增戰馬革濫賞厲奇功選勇畧充親隨等朝廷從之八年白歸文班遷刑部侍郎同列議大辟三鞠之弗承宜令以衆證就刑欲立爲令彥直持不可議卒格會當遣使於金帝親擇以往既至守節不屈金卒禮遣之

遷吏部侍郎改工部尚書以言罷尋知濕州首捕巨猾王永年窮治之杖徙他州奏免民間積逋以郡餘財代輸海寇出沒大洋彥直授將領土豪等方畧不旬日生擒賊首海盜爲清奏功進敷文閣學士以弟彥質爲兩浙轉運判官進龍圖閣學士致仕卒

宋史韓世忠

傳彥古知平江府至郡有士人持吏短長投狀以占能否彥古曰此狀汝不能爲必有吏人爲者其人錯愕即以實告於是拘吏杖之一郡以爲神明

姓譜○按彥古彥質弟延安人

金

楊邦基字德懋華陰人天眷二年登進士第遷太原尹徒單恭貪汙不法託名鑄金佛命屬縣輸金邦基獨不與徒單恭怒召至府將以手持鐵柱杖撞邦基面邦基不動以廉爲河東第一遷秘書監兼左諫議大夫出爲永定軍節度使致仕卒邦基能屬文善畫山

水人物尤以畫名當世云

金史本傳

趙重福字履祥豐州人試補女直令史遷滄州鹽副使歲饑民煮鹵爲鹽賣以給食鹽官往往杖殺之重福曰寧使課殿不忍殺人歲滿課殿當降三司使以歲荒薄其罰遷都水少監治密雲縣貞祐二年以守密雲功遷同知河間府事二年河間被圍有劉中者勸重福出降重福不聽是時河間兵少多羸疾不任戰重福勸其父老率其子弟強者戰弱者守圍解遷河東北路轉運使致仕卒

金史本傳

武都字文伯東勝州人大定十二年進士調陽穀主簿遷高水令縣素多盜都皆廉得姓名榜之通衢約無再犯悉奔他境累遷中都路都轉運副使以親老與弟御史郁俱乞侍尋丁憂服除遷灤州刺史入爲戶部郎中被詔由海道漕遼東粟賑山東都高其價

募人入粟招海賈船致之遷中都西京按察副使以勞遷本路按察使備禦西京有勞召爲戶部尚書中都戒嚴都知大興府醉酒以褻衣見詔使坐是解職起爲刑部尚書河東路宣撫使以疾卒

金史
本傳

謝仲溫字君玉豐縣人畧涉書史世祖命備宿衛中統元年擢平陽太原兩路宣撫使至元九年遷順德路總管時方用兵江淮有寡婦鬻子以償轉輸之直仲溫出俸金贖還之十六年爲湖南宣慰

使二十二年改淮東歲旱仲溫導白水塘灌民田公私賴焉

元史
本傳

張敏富平人大定間進士爲聞喜令有善政至元初民爲立碑

賈志

宋規字漢臣長安人親歿廬墓瑞草生中統戊戌徵試中論賦兩科拜議事官先是官吏縱肆日久數侵苦小民規繩之以法惕然皆

莫敢犯丙辰春詣闕陳便宜數事上悉嘉納爲耀州尹官蜀道憲

副政聲著聞

關學編

程思廉字介甫家東勝州父恒國初佩金符爲解州鹽使思廉用薦給事裕宗潛邸以謹愿聞至元十二年同知淇州累遷河北河南道按察副使道過彰德聞兩河歲饑而徵租益急欲止之有司謂法當上請思廉曰民不堪命矣即移文罷征後果得請二十年河北復大饑流民渡河求食朝廷遣使者集官屬絕河止之思廉曰民饑就食豈得已哉亟令縱之章上不之罪衛輝懷孟大水思廉臨視賑貸全活甚衆城不沒者數版即修隄防露宿督役水不爲患衛人德之遷陝西漢中道按察使成宗即位除河東山西廉訪使太原歲飼諸王駝馬一萬四千餘匹思廉爲請止飼千匹平陽諸郡歲輸租稅於北方民甚苦之思廉爲請得輸河東近倉

決事咸有議劄權歸曹吏思廉自判牘尾某當某罪吏皆束手思廉累任風憲言事剴切與人交有終始其於家族尤盡恩意好薦

達人物卒謚敬肅

元史本傳

趙弼字元輔雲陽人歷大都留守京師勢家望族爲之斂迹後以使出宣慰荆西湖北時西蜀諸夷貢物率舟達江陵山塗五百里賦民負之甚苦弼乃浚故漕渠灌以沮漳之水達湖入白湫通漢中置龍岡奉申二水驛以省勞費荆民惠之名趙公河大德三年爲平章政事議陝西省事卒

賈志

線曲律不花京兆人至元六年監元氏勤於公務晨夕無倦民有爭

訟立剖決之每月朔望至文廟行禮畢揖耆儒升講堂序坐吏曹

各專一經講明正理使日新所聞明年春夏蝗旱相仍祈禱自罪

甘雨應期蝗遂出境

畿輔志

口貳字伯充河內人父佑初隸兵籍轉徙北郡復至關中家焉廉希
憲宣撫京兆聘許衡教授生徒或從衡學衡爲祭酒舉或爲伴讀
輔成教養或功爲多至元十四年授四川行樞密院都事宋安撫
使王立守合州西院獲立偵卒張郃等將殺之或釋郃等俾歸諭
立立降瀘叙等郡相繼送款巴黔民感之改華州知州勸農興學
俱有成效及代民爭留之大德中河東關隴地震移書廟堂陳救
災弭患之道仁宗即位拜翰林侍讀學士未幾致仕遣使給驛送
關中卒諡文穆

元史
本傳

劉允中號西澗美原人大德間授順鹿路總管討叛酋有功調廣南
郡尹故事三五姓聯戶飼馬民苦甚允中令月出緡錢市馬人便
安之遷長寧州同知地接蠻徼允中招徠之又教作水車引溉陸
田並令子弟入學風俗丕變後改涇州值歲饑百方賑濟全活甚

衆三年請老制以耀州知州致仕

富平志

賀勝仁傑子字貞卿

鄆人

嘗從許衡學通經傳大義年十六入宿衛凝

重寡言世祖甚器重之拜集賢學士三十年簽樞密院事遷大都

護大德九年父仁傑請老代爲上都留守既至通商賈抑豪縱出

納有法供億不匱民賴以安奉聖州民高氏籍虎賁以貲雄鄉里

身死子幼有達官利其財使部曲強娶高氏婦勝白帝斥之高氏

以全歲大饑輒發倉廩賑民民德之爲立祠上都西門外開平人

張弼家富弼死其奴索錢民家弗得毆負錢者至死治獄者教奴

引弼子並下獄丞相鐵木迭兒受賂不爲直勝聞以語御史遂劾

奏丞相罷之英宗即位鐵木迭兒復相誣勝殺之百姓持紙錢哭

屍傍甚哀泰定中詔雪其冤謚惠愍至正三年改謚忠宣子二惟

一左丞相惟賢同知上都留守司事

元史本傳

薛榮字君英渭南人元貞二年以陝西行省薦補通事四年擢御史

臺譯史延佑二年遷興元路判官督修棧道有功至治二年以憲

司薦舉陞西和州知州延師儒興禮義綽有政聲終工部尚書

馬志

楊寅字敬伯乾州人恭懿之子性孝友兼善治生未嘗以匱乏貽親

憂嘗爲蓋屋尹仁嚴兼盡未滿旬朔宿弊盡祛以父喪去任哀毀

骨立後由韓城尹擢陝西行臺御史建言皆裨切時政轉江西行

臺山東廉訪使所至伸枉黜濫風紀振揚遷四川憲使泰定乙丑

陞國子祭酒講明正學誨誘不倦

賈志

程達藍田人有志常以天下國家爲分內事歷官雲南肅政廉訪

司僉事持憲凜然人咸畏服

賈志

李誠字克誠渭南人擢知三原任德緩刑勸農興學屏除奸盜鈴束

羣吏兵興轉粟輓芻量戶高下而均其徭民不告病時稱循吏

志

趙溉甘泉人明於經術至正間官吏部尚書清介不阿又延安劉萬

鐸官大司馬亦以政績爲時所重

延安志

石端甫渭南人舉茂材異等歷官四川憲副忠慎廉介卓有能名

賈志

郭均字叔平朝邑人至正時尹鄒課農興學有害政蠹民者悉伏法
一時訟簡盜息又引斜谷水溉田建常平倉積粟善治犁然時稱
良吏又高陵魏紹開知慶陽府臨潼趙公諒知三原縣涇陽潘希
賢爲永壽團尉鄠縣張雲翼爲同州同知皆以政績著聞

賈志

賈魯不喜關侯驍猛志氣同仇敵愾以如鼙鼓聞
身更又高爽聲聞喉嚨震動張遼驚曰公將破三賊
一和為備言又得徐公水無由盡費平余蘇藉善治
將此中如平陸也至五部兵驍猛與學不害如農兄
亦能書即南人舉其異善習習四山盡陷賊無存卓
戰有大功亦必死無知無重
賈魯甘泉人陷於孫權至五部守其將尚書書系不
所又致受侮萬

